

Primërë cartë nabëquë'ë San Pablo lu mënë Corintios

**Bëquë'ë Pablo tubi cartë nu
bëshë'ldi'in lu ra shmënë
Dios naquërelde Corinto**

1 Na Pablo, nahia tubi nagulë Dios. Nahia tubi poshtë shtë Jesucristo purquë zni na voluntá shtë më. Bëshe'ldë më na. ²Juntë con Sóstenes, bëcha'a, quëquë'a cartë rë' nu guëshë'ldahin lu grupë shtë shmënë Dios naquërelde guë'dchi Corinto. Na të shmënë më nabëzunë Dios almë shtë të purquë unidë na të con Cristo Jesús. Dios guna'bë lë'ë të, të gac të santu. Na të shmënë më igual ziquë los de más naná rianaldë tëchi ldai' shtë Jesucristo, Shláma'a. Na më el quë narnibë'a lë'ë rai' nu también rnibë'a më lë'ë hia'a. ³Gulë bë'në recibir bendición shtë më nu gulë cuedchí ldu'u të por Dios, Shtáda'a nu por Jesucristo Shláma'a.

Bendición nadápa'a por Jesucristo

⁴Siempre rdë'a graci lu Dios por lë'ë të nu rdë'a graci lu më por ra favurë shtë Dios nanapë të purquë unidë na të con Jesucristo. ⁵Por na të unidë con Cristo, Dios bëne'e grëtë' clasë bendición naná rac

bë'a të pë runë cuntienë shti'dzë më nu rac të ruadi'dzë të shti'dzë më. ⁶Grë ndë'ë quëhunin testificar de quë na verdá shti'dzë Jesús, di'dzë nabiadi'dzë na'a lu të iurë guquërelde'nú na'a lë'ë të. ⁷Iurne' adë pë runë fáltëdi'i lo quë narnel'e Dios. Napë të pudërë shtë Espíritu Santo mientras quëbezë të con ánimo dzë naguëabrí Jesucristo, Shláma'a, stubi. ⁸Lë'ë më gunë më compa'ni lë'ë të parë gac të firmë lu shnezë më hashtë fin shtë guë'dchiliu. Iurní ni tubi chu guëdchi'bë galquíá guëc të; guëa'në të sin culpë dzë naguëabrí më stubi. ⁹Dios siempre quëhúni' cumplir grë shti'dzë më. Lë'ë më guna'bë më lë'ë të parë gac të unidë con shini më, Jesucristo Shláma'a.

Divisioni entrë ra shmënë Dios

¹⁰Bëchi, quëhuna ruëguë lu të purquë na hia'a shmënë Jesucristo. Gulë gac të de acuerdë con lo quë naruadi'dzë të nu adë rdë'ëdi'i të sí tsu divisioni entrë lë'ë të. Gulë guquërelde të sin dishi'bi. Gulë gapë mizme llgabë nu gulë bë'në juzguë mizme manërë. ¹¹Rnia'a lu të ndë'ë, bëchi, purquë ra famili shtë Cloé

guni'i rai' lua nanú dishi'bi entrë
lë'ë të. ¹²Nahin verdá; tubi të rni'i:
“Na nahia shmënë Pablo”. Stubi të
rni'i: “Nahia shmënë Apolos”. Stubi
të rni'i: “Nahia shmënë Cefas”. Stubi
të rni'i: “Nahia shmënë Cristo”.
¹³¿Gu nanú zihani Cristo? Nané të
na, Pablo, adë cuédia'a lu cruz por
duldë shtë të. Adë bëriubë nisë të en
el nombre shtë Pablo. ¹⁴Dushquilli
Dios de quë adë bëchu'bë nísëdia'a
ni tubi de lë'ë të sino sulë Crispo nu
Gayo ¹⁵të adë guení'idi'il bëchu'bë
nisë Pablo lé'ël en el nombre shtë
Pablo. ¹⁶Nu zac bëchu'bë nisa ra
famili shtë Estéfnas perë adë
rëagnádi'i ldua'a bëchu'bë nisa stubi
de lë'ë të. ¹⁷Pues Cristo bëshe'ldë
më na parë guadi'dza diza'quë lu
ra mënë, lédëdi'i parë guëchu'bë
nisa ra mënë. Bëshe'ldë më na parë
guadi'dza lu mënë manërë sencigi,
lédëdi'i con di'dzë nadë rac bé'adi'i
mënë humildë të parë guëdë'ë mieti
cuendë pë runë cuntienë galguti
shtë Jesús lu cruz.

**Cristo nápi' pudërë; por lé'i'
ze'dë guëdchini llni shtë Dios**

¹⁸Diza'quë de quë guti Cristo lu
cruz por lë'ë hia'a nahin ziquë cusë
nadë rlluí'idi'i parë ra narianaldë
nezë mal catë tsalú rall, perë parë
lë'ë hia'a nazia'a nezë za'quë catë gac
salvára'a, diza'quë ni na pudërë shtë
Dios. ¹⁹Zni rni'i Sagradas Escrituras:
Guëzalúa grétë' llni shtë ra më
sabi;
Guësëana tubi cu' grë ra llgabë
shtë ra namás rac bë'a.
²⁰¿Pë fin napë ra di'dzë shtë
më sabi u ra di'dzë shtë ra
narlua'a lëy shtë Moisés?

¿Ca nanú ra enseñansë shtë ra
nardildi di'dzë?

Ra enseñansë shtë mësë narianaldë
llgabë shtë mënë, pues Dios bëluá'ai'
enseñansë shtë rall na tuntë. ²¹Dios
el quë narac bë'a grétë' cusë nu rac
gunë më grë cusë, gunibé'ai' de quë
ra mënë shtë guédchiliu nunquë
gunguë bé'adi'i rall lë'ë më por
prupi llni shtë rall, nilë por tantë
narac rall. Más bien gac shtu'u më
gac salvar mieti sulë por diza'quë.
Rni'i mënë tuntë nahin, perë por
diza'quë gac salvar grë ra narialdí
ldu'i shti'dzë më.

²²Ra mënë israelitë rac shtu'u
rall guená rall milagrë shtë Dios,
iurní tsaldí ldu'u rall. Ra mënë
nanádi'i më israelitë, rguili rall llni
nanapë mënë guédchiliu ²³perë
lë'ë hia'a rdia'a dí'dza'a de quë
por galguti shtë Cristo lu cruz gac
salvára'a. Parë ra mënë israelitë
diza'quë na ziquë tubi guë'ë catë
rrelde rall. Parë ra mënë nanádi'i
më israelitë, diza'quë na ziquë
cusë nadë rlluí'idi'i. ²⁴Perë grë ra
naguna'bë Dios, ra më israelitë
u ra nanádi'i më israelitë, sulë
Cristo na nezë parë gac salvar
mieti. Cristo na pudërë nu llni shtë
Dios parë gac salvára'a. ²⁵Parë ra
mënë guédchiliu, diza'quë shtë
Dios na ziquë cusë nadë rlluí'idi'i,
perë rnía'a lu të llni shtë Dios más
lasac quë grë ra llni nanapë mënë
guédchiliu; nu lo quë narni'i rall na
débil parë Dios, nahin más fuertë
quë grë ra fuersë nanapë mënë.
²⁶Dadë, gulë bédë'ë cuendë de quë
Dios gudili më lë'ë të aunquë du'psë
de lë'ë të rac bë'a të según llgabë
shtë ra mënë. Du'psë të na të më

nalasac; du'psë të na mënë naná rnibë'a. ²⁷Dios gulé ra mënë sencigi, ra nadë ráquëdi'i, të parë guëtú lu ra më sabi, ra nanapë llni shtë mënë. Gulé më ra mënë débíl según llgabë shtë mënë parë guëtú lu ra mënë namás fuertë. ²⁸Gulé më ra nalasáquëdi'i nu ra mënë narunë ra sáhi' desprëci; quiere decir, gulé më cusë nalasáquëdi'i parë tsalú cusë narni'i mënë napin valurë nu parë guëlua'a lu llni ra cusë narni'i mënë adë nádi'i verdá. ²⁹Zni bënë më të adë chu gunë nadchínidi'i delante lu më. ³⁰Perë mizmë Dios bënë më unír lë'ë të con Cristo Jesús nu bënë Dios të gac bè'a hia'a lë'ë më por Cristo, nu por Cristo tubldí na shcuénda'a lu Dios. Por Cristo na hia'a shmënë më naná rzuné almë shtë hia'a. Por Cristo na hia'a salvar. Guzi'i më lë'ë hia'a. ³¹Zni nahin de acuerdë lo quë narni'i Sagradas Escrituras: "Si talë tubi de lë'ë të runë nadchíníl pues bënë nadchini sulë por lo quë nabënë Dadë".

Diza'quë nu galguti shtë Jesús

2 Bëchi, iurë bidë guënia'a lu të lë'ë verdá shtë Dios, adë biadi'dzëdia'a ziquë tubi mësë narlua'a con di'dzë nadë rac bé'adi'i të sino biadi'dza clarë. Gunia'a lu të di'dzë nabëlua'a Dios lua. ²Iurë guquërdëndúa lë'ë të, guni'i ldua'a guadi'dza sulë tubsë di'dzë de quë Jesucristo gunë salvar lë'ë hia'a, de quë guti më lu cruz por lë'ë hia'a. ³Iurë bidë guëdchinia lu të, pues adë gualdídi'i ldua'a mizmë na sino bëdzëba nu bëchi'cha. ⁴Iurë gunia'a lu të ra diza'quë shtë Dios, adë guni'inúdia'a lë'ë të con di'dzë

sabi naze'dë por llni nanapë mënë gué'dchiliu, sino guni'inúa lë'ë të con pudërë shtë Espíritu Santo, el quë nabënë zihani cusë ru'bë. ⁵Guni'inúa lë'ë të, të tsaldí ldu'u të shti'dzë Dios purquë bini të pudërë shtë më, lédëdi'i por tantë rac ruadi'dza. Zni gac parë gac të firmë; dchi'chi na fe shtë të ziquë tubi cimientë shtë hiu'u.

Por Espíritu Santo rac bè'a hia'a

⁶Zni na manërë biadi'dzë na'a diza'quë lu ra mënë, perë biadi'dzë na'a di'dzë sabi lu ra mënë namás rianaldë ra shnezë Dios. Ra di'dzë sabi naruadi'dzë na'a, adë zé'dëdi'in de gué'dchiliu rë', nilë por ra mënë naquëgnibë'a ra sa' rall. Grë cusë ni nasesë tsalú ra ⁷perë ruadi'dzë na'a con llni shtë Dios. Ruadi'dzë na'a ra cusë secretë shtë Dios. Ruadi'dzë na'a di'dzë sabi shtë më, ra cusë nabënë më ordenar antsë cueshtë gué'dchiliu parë gac salvára'a. ⁸Ni tubi ra naná rnibë'a lu gué'dchiliu rë', adë riasédi'i rall ndë'ë. Si talë niasé rall, adë niaquë'di'i rall Dadë Jesús lu cruz, el quë narnibë'a guëdubi gube'ë. ⁹Zni rni'i Sagradas Escrituras:

Dios bënë më preparar cusë adë ni chu gunádi'i nu adë chu bínidi'i, nu adë chu bé'nëdi'i llgabë.

Cusë ni na parë ra narac shtu'u lë'ë më.

¹⁰Grë ndë'ë bëlua'a më lu hia'a por Espíritu shtë më. Lë'ë Espíritu na llni nu riasé Espíritu ra cusë namás naga'chi, hashtë shgabë Dios namás secretë rac bè'a Espíritu.

¹¹¿Chull gac bè'a lo quë nanú la'ni ldu'u nguii? Mizmë nguii riasëll

llgabë nananú la'ni ldú'ull. Zni na con Dios; sulamëntë Espíritu shtë më rac bē'a llgabë shtë më.
¹²Lē'ë hia'a adë bēdē'nēdi'ia'a recibir Espíritu naná rnibē'a mēnē shtë guédchiliu sino bēdē'na'a recibir Espíritu naná ze'dē de Dios tē gac bē'a hia'a grē bendición nabēzēlaa'chi mē parē lē'ë hia'a.
¹³Ruadi'dzē na'a shcuendē ra cusē rē' con di'dzē nabēlua'a Espíritu shtë Dios, lédēdi'i con di'dzē nabēsē'dē na'a por ra mēsē shtë guédchiliu. Zni rlua'a na'a ra cusē shtë Espíritu lu ra mēnē narianaldē tēchi Espíritu Santo.

¹⁴Grē ra nanápēdi'i Espíritu cuezēnúhi' la'ni ldú'ull, adē rúnēdi'ill recibir di'dzē shtë Espíritu purquē parē lē'ëll cusē ni adē rluí'idi'i. Cusē tuntē rní'ill. Adē riasēdi'ill purquē rqui'ni llni shtë Espíritu parē tsasē mēnē ra cusē shtë Espíritu. ¹⁵Perē grētē' nacabezēnú Espíritu Santo rac bē'a rall grētē' cusē nalasac; perē ra sa' nguiu ni, ra nadē tsanáldēdi'i tēchi Espíritu Santo, adē rac bē'adi'i rall blac lasac na primērē nguiu ni. ¹⁶Ra Sagradas Escrituras rni'i: “¿Chull riasē? u ¿chu rac bē'a lla na llgabē shtë Dadē Dios? ¿Chull guēlua'a Dios?” Perē lē'ë hia'a nadápa'a Espíritu; por ni rac bē'a hia'a llgabē shtë Cristo.

Quédē'na'a sirvē lē'ë Dadē Dios

3 Zni nahin bēchi, adē gú'di'i manērē tē guadi'dza lu tē cumē ziquē mēnē naquēgsē Espíritu Santo, sino biadi'dza lu tē ziquē mēnē narianaldē tēchi ra cusē shtë guédchiliu. Na tē ziquē me'dē

en cuantē ra cusē shtë Cristo.

²Bēluá'ahia lē'ë tē con enseñansē sencigi cumē ziquē tubi me'dē naradchi. Rúnēdi'i tē gan gau tē cumidē ziquē mē ru'bē. Todavía adē riasēdi'i tē ra enseñansē naná rqui'ni parē su tē firmē lu shnezē Dios. ³Hashtë ne' na tē ziquē mēnē narianaldē tēchi ra cusē shtë guédchiliu; quērelde tē igual ziquē los de más sa' tē. ⁴Si talē rní'il: “Na nahia shmēnē Pablo”; stubi tē rní'il: “Nahia shmēnē Apolos”, iurni quēhunē tē llgabē ziquē ra mēnē shtë guédchiliu, lédēdi'i ziquē mēnē nanapē Espíritu Santo.

⁵¿Chull na Pablo? ¿Chull na Apolos? Na na'a nadē más ra nabēshe'ldē Dios; por shti'dzē na'a gualdí ldu'u tē diza'quē shtë Dadē. Cadē tubi muzē shtë Dios bē'ni' según fuersē nu llni nabēne'e mē. ⁶Na bēcabnía bē'dchi; Apolos gudi'li ra plantē, perē Dios bēsēru'bē mē ra plantē ni. ⁷De manērē de quē ni tubi na'a, el quē nabēcabnī bē'dchi u el quē naguati'li ra plantē, lasáquēdi'i na'a, perē Dios na el quē nalasac. Bēsēru'bē mē ra plantē. ⁸El quē narcabnī nu el quē nargui'li, na rai' unidē, nu Dios quilli cadē tubi lē'ë hia'a según dchi'ni naquédē'na'a. ⁹Grē hia'a na hia'a ra nardē'na'a dchi'ni juntē con lē'ë mē. Lē'ë tē na tē ziquē guiu'u lachi catē quēhunē mē dchi'ni.

Na tē ziquē tubi hiu'u naquēgza'a mē. ¹⁰Nahia ziquē mēsē albañil naná gulē Dios parē guēzu'ba cimientē shtë hiu'u. Hia stubi quēgza'a hiu'u guēc cimientē ni. El quē narza'a hiu'u rqui'ni gápi'

cuidadë manërë naquëgzá'all hui'u. ¹¹Pues ni tubi adë chu nápëdi'i derechë guëzúbëll stubi cimientë purquë hia nanú cimientë verdadërë naná mizme Jesucristo. ¹²Perë cadë nguii quëgzá'all tubi hui'u con orë u bédchichi u guë'ë nalasac u con hiaguë u con gui'lli guia. ¹³Lë'ë dchi'ni de cadë lë'ë hia'a guëru'u lu llni dzë shtë juici. Dzë ni guëdchini gui'i tē parë gunë gui'i prëbë pë clasë dchi'ni bē'nē mieti. ¹⁴Si talë tubi de lë'ë hia'a bëza'a tubi hui'u nanadë tsequi lu gui'i, gunë nguii ni recibir pagu por dchi'ni nabē'nëll ¹⁵perë en cambi, si talë tubi de lë'ë hia'a guëza'a hia'a tubi hui'u con cusë naná sutípëdi'i lu gui'i, pues guëníitill grëtë'; nídi'i pagu parë lë'ëll aunquë lë'ëll gac salvárëll cumë ziquë rgu nguii tubi cusë la'ni hui'u narië'qui.

¹⁶¿Pë adë rac bē'adi'i tē de quë na tē ziquë iádu'u catë cuezë Dios, de quë Espíritu shtë Dios cuezënúhi' la'ni ldu'u tē? ¹⁷Si talë tubi de lë'ë tē quëhúnëll usar iádu'u shtë më tubi cusë mal, guëne'e më fin parë lë'ëll. Catë cuezë më, nahin santu nu también cuerpë shtë tē na santu.

¹⁸Adë rsiguëdi'il mizme lë'ëll. Si talë tubi de lë'ë tē rní'il nal sabi con llni nanapë mënë guédchiliu, mejurë guëabril ziquë tubi naráquëdi'i tē gáquël më sabi de verdá. ¹⁹Pues llni shtë ra mënë narianaldë cusë shtë guédchiliu rë', nahin ziquë cusë tuntë parë Dios. Naescritë: "Dios quëhunë parë ldaguë më sabi lu galënasini shtë rall ziquë rlaguë tubi ma lu trampë". ²⁰Nu zac rni'i Sagradas

Escrituras: "Lë'ë Dadë rac bē'ai' ra llgabë shtë mënë sabi, de quë lasáquëdi'i shgabë rall". ²¹Por ni adë chu gunë nadchínidi'i de quë nall shmësë sa'll. Pues grëtë' cusë nahin parë lë'ë tē; ²²Pablo, Apolos, Pedro, guédchiliu, nu vidë, nu galguti, nu lo quë naná iurne', nu ra cusë naguër gac, grëhin na parë lë'ë tē. ²³Nu lë'ë tē na tē shmënë Cristo; rnibë'a më lë'ë tē nu Cristo rzu'bë diágui' shti'dzë Dios.

Dchi'ni shtë ra poshtë

4 Grëtë' tē napë quë gunë tē llgabë de quë na na'a sulamëntë shmuzë Cristo. Gulë më lë'ë na'a parë tsaglua'a na'a ra mënë di'dzë shtë më, cusë de quë antsë adë guc bē'adi'i mieti. ²El quë naná incarguë tubi dchi'ni, napë quë gáqui' naza'quë; napë quë gúni' cumplir lo quë narunë tucarë. ³Por partë shtëna adë riádi'i ldua'a iurë quëhunë tē juzguë lë'ë na, nilë riádi'i ldua'a por los de más sahia narunë juzguë na; pues adë ráquëdia'a gunë juzguë mizme na. ⁴Perë si talë ni tubi shgaba adë quëgdchí'bëdi'i galquiá cuntrë na, adë na segurë de quë nápëdia'a faltë. Lë'ë Dadë na el quë nagunë juzguë shchi'nia. ⁵Adë rúnëdi'i tē juzguë nasesë. Gulë cuezë hashtë lë'ë Dadë guëabré; guëgú më grëtë' cusë lu llni, grë lo quë naga'chi lu nacahi. Guëlua'a më grëtë' narac shtu'u mieti la'ni ldu'u rall. Iurní gunë më honrar cadë nguii según narunë tucarë.

⁶Dadë, quëadi'dza ra cusë rë' parë bien shtë tē. Quëgdchi'ba tubi comparaciuni naná runë tratë

dchi'ni nabëdë'në na'a, Apolos con na. Gulë guagla'guë enseñanse shtë na'a; gulë bë'në cumplir lo quë narni'i Sagradas Escrituras shcuendë lo quë narunë tucare gunë mënë, nu parë ni tubi të adë rní'idi'i nadchini de mësë shtënél nu rúnël desprëci stubi mësë entrë lë'ë të. ⁷ ¿Chull bë'në të tsu tubi mësë entrë lë'ë të? ¿Pë cusë nápël nanádi'i lo quë nabé'nël recibir? Si talë bēzēlaa'chi mē lo quē nanápēl, ¿pēzielú runē nadchíníl? Rúnēl ziquē lē'ēl bē'nēl gan por mizme fuersē shtënél.

⁸Lë'ë të mē Corinto, runē nadchini të purquē rni'i të adë pē runē fáltēdi'i, de quē napē të grē bendición narshe'ldē Dios dizdē gube'le. Runē të llgabē rquí'nidi'i të lē'ë na'a, de quē rnibē'a të ziquē rēy, de quē lasáquēdi'i na'a. Nalē rac shtua'a de quē nanibē'a të ziquē rēy të guēnibē'anú na'a lē'ë të. ⁹Pues llua'ahia de quē Dios bēsa'nē mē lē'ë na'a ra poshtë lúltimē lugar. Na na'a ziquē ra mēnē mal naguc condenar parē gati rai'. Dzu na'a lu ra mēnē nu lu ra ianglē nadē más parē guēbi'a rai' lu na'a cumē cusē nardzēguēē' ldu'u mieti. ¹⁰Rdē'nē na'a sirvē lu Cristo perē lē'ë të rni'i të na na'a tuntē mientras rni'i të na të shmēnē mē namás rac bē'a. Na na'a ra nalasáquēdi'i perē lē'ë të sí, lasac të. Quēhunē mēnē honrar lē'ë të perē quēhunē të desprēci lē'ë na'a. ¹¹Hashtë iurne' quēgzac zi na'a lu galērlidia'nē nu lu galērbidchi; runē faltē shabē na'a; ra mēnē rushtiá rall guēc na'a; adē nídi'i lidchi na'a. ¹²Rdzaguē na'a lu ra dchi'ni naquēhunē guia'a

na'a. Ra mēnē rgue guēc na'a perē rdchigrē na'a con di'dzē nanapē bendición shtë Dios. Rzunaldē rall lē'ë na'a perē lē'ë na'a rua'a ldu'u na'a sin adē pē rní'idi'i na'a cuntrē lē'ë rall. ¹³Rni'i rall cuntrē lē'ë na'a perē na na'a pacēnci. Quēhunē rall tratē lē'ë na'a ziquē guílli lu nezē; runē rall tratē lē'ë na'a ziquē cusē más nadzabē la'ni guē'dchiliu, cusē nadē rlluí'idi'i.

¹⁴Adē rquē'edia'a ndē'ē parē guētú lu të sino parē guēnehia cunsēju ziquē ra shinia narac shtua'a. ¹⁵Aunque napē të chi'i mili mēsē naná rlua'a lē'ë të, napē të tubsē shtadē të. Por ra diza'quē nagunia'a lu të, na të unidē con Cristo Jesús. Por ni nahia ziquē shtadē të. ¹⁶Por ni quēhuna ruēguē lu të de quē cubēnebi të cumē ziquē ejemplē shtëna. ¹⁷Parē gunē të cumplir narac shtua'a, bēshe'lda Timoteo lu të. Náhi' tubi nguiu nabēna gan por Cristo nu rac shtua'a lē'i'. Siemprē quērelde zá'quēll ziquē shmēnē Dios. Lē'ë Timoteo guēsēagná ldú'i' lē'ë të lo mizme enseñansē nabēlua'ahia lla narunē tucare guēquērelde ra mēnē shtë Cristo, igual ziquē rluá'ahia guēdubi lugar catē nanú grupē shtë shmēnē Dios. ¹⁸Nanú bēldá de lē'ë të nalē runē rall nadchini; runē rall llgabē adē gueldē guēnádía'a lē'ë të ¹⁹perē quēbeza të parē tsahia lueguē nu gueldē guēnahia lē'ë të si talē Dadē guēné'ei' permi. Iurní gac bē'ahia chu narunē nadchini. Gac bē'ahia si talē nadē más ruadi'dzē rall u si napē rall pudēre shtë Dios. ²⁰Catē rnibē'a Dios ziquē rēy, nanú más quē di'dzē

narni'i mēnē; nanú milagrē nu sēñi naquēhunē mē. ²¹ ¿Pē rac shtu'u tē? ¿Zeldē guēnahia lē'ē tē con tubi hiaguē; gau tē varē? u ¿zeldē guēnahia lē'ē tē cumē mē nadu'u, ziquē tubi narac shtu'u lē'ē tē?

**Napē quē gunē tē juzguē
el quē nabē'nē mal**

5 Quēgni'i mēnē de quē entrē lē'ē tē nanú ra naquērēldē mal, de quē tubi nguii cuá'all shmadrástēll. Pues duldē ni ra mēnē nanadē israelitē, adē rúnēdi'i rall duldē ni. ² Mejurē niatú lu tē nu niu'nē tē por conductē shtē nguii ni. Runē tucarē guēgú tē lē'ēll ladi grupē shtē shmēnē Dios. ³ Pues aunquē la'di sūdía'a nga'li perē rēagná ldu'a lē'ē tē. Hia bēna juzguē el quē nabē'nē duldē ni cumē zugá'ahia nga'li con lē'ē tē. ⁴ Gulē bēdēá con autoridá shtē Dadē Jesucristo, nu lē'ē na quēbezēnúa lē'ē tē con espíritu shtēna, nu lē'ē pudērē shtēnē Jesucristo Shlámá'a, quēbezēnú lē'ē tē. ⁵ Gulē bē'nē intriegu nguii ni guia'a Satanás tē parē tsalú shcuérpēll con mal deseo shtēnēll, perē espíritu shtē nguii ni gac salvar iurē lē'ē Dadē Jesús guēabrí stubi.

⁶ Mal na iurē runē natchini tē. ¿Pēllē adē guēnēdi'i tē tubi dichē narni'i: “Du'pē levadurē rdē'ē fuersē guēdubi nacubē”? ⁷ Gulē bē'nē ziquē ra mēnē israelitē guahietē. Iurē bēdchini laní Pascu, gulú rall grē guetēshtildi naguctsa'u con levadurē. Gulē bēsa'nē grē duldē nananú entrē lē'ē tē, tē gac tē limpi ziquē guetēshtildi cubi nagudáu ra mēnē israelitē dzē

shtē laní. Gulē guná, lē'ē lli'li shtē Pascu, hia guti. ¿Chu na sacrifici ni? Pues mizmē Cristo. ⁸ Zni rqui'ni guēquērdēdu'u hia'a con ldu'u limpi nu con verdá naná ziquē guetēshtildi sin levadurē. Adē chu guēquērdēdi'i con cusē mal; adē gápēdi'i tē llanē la'ni ldu'u tē.

⁹ La'ni stubi cartē nabēshe'lida lu tē, guní'ihia lu tē adē gápēdi'i tē tratē con ra narquēnú ra sáhi'. ¹⁰ Adē guní'idia'a lu tē de quē na mal si talē napē tē tratē con ra mēnē shtē guē'dchiliu, ra narquēnú ra sáhi', u ra narzebi ldu'u pē shtē mē, u ra nguba'nē, u ra narunē adorar ra figurē naractsa'u, purquē nídi'i mudē guēquērēldē tē lu guē'dchiliu sin quē napē tē tratē con ra mēnē ni. ¹¹ Lo quē nagunia'a lu tē iurnē, adē gapē tē tratē con tubi nguii naná rni'i nall shmēnē Dios. Si talē nguii ni rquēnull ra sáhi', u si talē rzebi ldú'ull pē shtē mēnē, u si talē rúnēll adorar ra figurē, u si talē ruadí'dzēll cuntrē sa'll, u si talē rzuu'dchill, u si talē nall nguba'nē; con nguii ni adē raunúdi'i tē lē'ēll. ¹²⁻¹³ Pues adē rúnēdi'i tucarē guna juzguē ra mēnē shtē guē'dchiliu; pues Dios gúni' juzguē lē'ē rall perē grupē shtē shmēnē Dios, sí, runē tucarē gunē rall juzguē sa' rall. Por ni gulē cu nguii naquēhunē duldē ni entrē lē'ē tē.

**Ra dishi'bi nariagdchininú
tē lu ra juēsi**

6 Adē nazá'quēdi'i rdchi'bē tē galquiá cuntrē stubi sa'l delantē ra juēsi nanadē guēnēdi'i Dios. Gulē bē'nē rēglē ra asuntē

entrë mizmë lë'ë të. ²Nanë të ra shmënë Dios gunë rai' juzguë ra mënë shtë guédchiliu. Si talë gunë të juzguë ra mënë shtë guédchiliu, pues rac të gunë të juzguë ra asuntë mitu'në entrë ra grupë shtë shmënë Dios. ³¿Pëllë adë rac bé'adi'i të de quë guédë'na'a juzguë ra ianglë? Cuantë más runë tucarë guédë'na'a juzguë ra asuntë shtë vidë rë'.

⁴Si talë nápël problemë con stubi sa'll, adë nazá'quëdi'i guédchí'bël galquiá cuntrë sa'll. Pues ra shmënë Dios namás lasáquëdi'i entrë lë'ë të, rac rall gunë rall rëglë asuntë shtë'nël. ⁵Ndë'ë rnia'a lu të, të parë guëtú lu të. ¿Pëllë adë nídi'i entrë lë'ë të ni siquierë tubi naná rac gunë juzguë parë gúnëll rëglë asuntë nanápël? ⁶¿Pëllë rqui'ni tubi narialdí ldu'i Dios, guédchí'bëll demandë lu stubi sa'll delantë lu ra juësi naguënëdi'i Dios?

⁷Napë të dishi'bi nu rdchi'bë të galquiá cuntrë sa' të. Rlua'a de quë adë bé'nëdi'i të cumplir shti'dzë Jesús; napë të faltë. Mejurë gulë bè'në sufrir mal tratë. Gulë bédë'ë sí cuanë mënë lo quë nanápël. ⁸En cambi quëhunë të mal; rbaa'nël pë cusë shtë ra naná shmënë Dios.

⁹¿Pëllë adë rac bé'adi'i të de quë grétë' ra mënë mal, adë tsutédi'i rall catë quëbezë Dios? Adë rdé'ëdi'i të sí parë guëguguë sa' të lë'ë të. Ra narquënú sa'll, ra narunë adorar figurë, ra narunë duldë adulteri, ra narunë ziquë ra mamflor, ¹⁰ra nguba'në, ra narzebi ldu'u pë shtë sa'll, ra zudchi, ra naná runë cuntrë sa'll, ra nardchisú pë shtë mënë con engaño; grë mënë ni adë ni mudë tsuté rall lugar catë rnibë'a Dios

ziquë Rëy. ¹¹Antsë zni bè'në të; guc të igual ziquë ra mënë ni perë iurne' bèzunë mē almë shtë të; unidë na të con Dios santu. Napë të tratë con Dios; bè'në mē recibir lë'ë të por lo quë nabë'në Jesucristo juntë con Espíritu nabëshe'ldë Dios, Shtëda'a.

Shcuerpë nguii na santu

¹²Rni'i mënë: “Nahia librë parë guna lo quë narac shtua'a”. Perë rnia'a lu të, grë cusë adë rsédchínidi'i cusë za'quë parë lë'ë hia'a. Rní'il de quë nahia librë parë guna lo quë narac shtua'a, perë adë guédé'dia'a sí parë guë'nibë'a cusë mal na. Adë nádia'a bajo ordë shtë ra cusë ni. ¹³Stubi cusë rni'i mieti: “Cumidë na parë guédáuha'a nu nabánia'a parë guédáuha'a” perë Dios guédé'ëi' fin guërupë ra cusë ni. Nídi'i verdá de quë cuerpë shtë mieti na parë guëquënú mieti sa'll, sino shcuérpa'a na parë lë'ë Dadë Jesús nu lë'ë Dadë na parë bien shtë hia'a. ¹⁴Ziquë bëldishtë Dios lë'ë Dadë Jesús ladi ra tëgulë, zni zac guëldishtë mē lë'ë hia'a con pudërë shtë mē.

¹⁵¿Pëllë adë rdé'ëdi'i të cuendë de quë cadë tubi de lë'ë të na partë shtë cuerpë shtë Cristo? ¿Ni mudë guënehia sí parë partë shtë Cristo gaquin partë shtë cuerpë shtë na'a mal? Aquëdi'i, jamás gaquin zni. ¹⁶¿Pëllë adë rdé'ëdi'i të cuendë de quë iurë tubi nguii rquënull con tubi na'a mal, hia iurní guërupë rall rac rall tubsë cuerpë? Pues ra Sagradas Escrituras rni'i: “Guërupë rall gac rall tubsë cuerpë”. ¹⁷Perë iurë tubi mieti gac unir con Dadë, hia guërupë rai' na rai' tubsë. Napë rai' mizmë espíritu.

¹⁸Gulë bëllu'në lu grë duldë narunë tratë cusë mal entrë ra na'a nu ra nguii. Cualquier stubi duldë naná runë tubi mieti, quëhunin dañi parë sa'll, perë el quë narquënú sáhi', quëhúnëll dañi cuntrë prupi shcuérpëll. ¹⁹¿Pëllë adë rdé'edi'i tē cuendē de quē cuerpē shtë tē na lugar catē cuezē Espíritu Santo? Bëdë'ë Dios Espíritu Santo parë cuezënúhi' lë'ë tē, parë guëquërdënúhi' lë'ë tē. Lë'ë më na më dueñi shtë tē; rnibë'a më lë'ë tē, lédëdi'i rnibë'a tē mizmë lë'ë tē. ²⁰Guzi'i Dios lë'ë tē tubi präci namás lasac tē gac tē shmënë më. Por ni gulë bë'në honrar lë'ë më con cuerpë shtë tē nu con espíritu shtë tē. Guërupë cusë ni ze'dë de Dios.

Cunseju parë ra casadë

7 Iurne' guna contëstë ra preguntë naguna'bë di'dzë tē la'ni cartë nabëshe'ldë tē. Bien nahin parë tubi nguii de quë guëtsé'adi'i nguii ²perë cumë nanú zihani tentación parë gunë mieti duldë, mejurë cadë nguii gapë tsé'lëll nu cadë na'a gápi' tsé'li'. ³Grë ra nguii naná casadë napë quë gunë rall cumplir lo quë narunë tucarë ziquë tse'lë na'a, nu ra na'a casadë napë quë gunë rall cumplir con tse'lë rai'. ⁴Tubi na'a adë nádi'ill dueñi shtëné shcuérpëll sino quë tsé'li' nápëll derechë parë shcuerpë tsé'li'. Mizmë manërë ra nguii adë nádi'ill dueñi shtë shcuérpëll sino quë tse'lë nguii nápëll derechë parë shcuerpë nguii. ⁵Lë'ë tē naná casadë, adë rúnëdi'il negar parë ga'anul tsé'lëll; sulamëntë si talë guërupë tē na tē

de acuerdë por tubi tiempë parë gunë tē orar lu Dios, hia despuësë napë quë guëbrí ga'anul tsé'lëll tē parë gúnëdi'i Satanás gan lul nu ldáguël lu duldë.

⁶Cagnia'a lu tē ndë'ë ziquë tubi permisi, lédëdi'i ziquë mandamientë shtë Dios. ⁷Pues por partë shtë na, rac shtua'a de quë grë nguii gac ziquë na, perë adë nádi'in posiblë. Bëzëlaa'dchi Dios cadë tubi nguii fuersë especial; bëldá rall rtsë'a; stubi nguii adë rtsé'adi'ill.

⁸Rnia'a lu ra nanádi'i casadë nu lu ra viudë de quë nabiën si adë guëtsé'adi'i tē ziquë nahia ⁹perë si talë adë ráquëdi'i gunë tē gan lu ra deseo, pues gulë bëtsë'a. Mejurë guëtsé'al quë gápël mal llgabë.

¹⁰Grëtë' tē shmënë Dios naná casadë, rnibé'ahia lu tē de quë ra na'a adë guësá'nëdi'ill tsé'ell. Mandadë rë' lédëdi'i shtëna sino nahin mandadë shtë Dadë Jesús. ¹¹Pues si talë tubi na'a bësá'nëll tsé'lëll; separadë na rall; adë cá'adi'ill stubi nguii u guëcá'all tsé'lëll stubi. Mizmë manërë napë quë gunë ra nguii cumplir; adë gáquëdi'i divorciar rall.

¹²Lu tē los de más mënë, rnia'a lo quë llua'ahia na bien. Lë'ë Dadë bësá'nëdi'i' di'dzë rë'. Si talë nanú tubi nguii rialdí ldú'ull shti'dzë Dios perë tsé'lëll adë rialdídi'i ldu'i shti'dzë më, perë lë'ë na'a ni nall cunformë guëquërdënull tsé'lëll, nguii ni napë quë tsagla'guë guëquërdëll con tsé'lëll. ¹³Nu zac, si talë tubi na'a rialdí ldú'ull shti'dzë Dios perë tsé'lëll adë rialdídi'i ldú'ull shti'dzë më, si

talë lë'ë nguii ni nall cunformë guëquërdënull tsé'lëll, adë gac divorciar rall. ¹⁴Lë'ë nguii nanadë rialdídí'i ldu'i perë tsé'li' sí rialdí ldu'i shti'dzë Dios, nguii ni rúnëll recibir bendición shtë Dios. Nu zac lë'ë na'a nanadë rialdídí'i ldu'i shti'dzë Dios perë tsé'lëll sí nall shmënë Dios, pues na'a ni quëhúnëll recibir bendición shtë Dios. Guc ldai' por Dios por nall unidë con tsé'lëll. Si talë lédëdi'i zni, shini shtë ra mënë ni na rai' ziquë shini ra nanadë rialdídí'i ldu'i Dios, perë iurne' ra shini rall quëhunë rall recibir ra bendición shtë Dios. ¹⁵Perë si talë lë'ë nguii u lë'ë na'a nadë rialdídí'i ldu'i Dios, rac shtú'ull guësá'nëll tsé'lëll, pues zni gaquin. Iurní lë'ë nguii u lë'ë na'a naná bëa'në, nall librë. Gulé Dios lë'ë hia'a parë guëquërélda'a en paz tē adë tsúdi'i dishi'bi entrë ra naná casadë. ¹⁶Lë'ë tē na'a, nídi'i segurë de quë tsaldí ldu'u tsé'lëll si guëquërdënull lë'ëll. Nu zac lë'ë tē nguii, nídi'i segurë tsé'lëll tsaldí ldu'i shti'dzë Jesús.

¹⁷Ndë'ë na narunë tucarë guëdë'na'a; cumë ziquë bënë'e Dios llni cadë túbia'a, cha guëdë'na'a cumplir voluntá shtë mē. Runë tucarë tsagla'guë nguii cumë iurë guna'bë mē lë'ëll. Pues runë tucarë tsagla'guë guëquërélda'a de acuerdë con principi shtë vidë cubi nadápa'a. Zni rnibé'ahia guëdubi grupë shtë shmënë Dios. ¹⁸Si talë iurë guna'bë Dios lë'ëll, nu nápël sēñi de quë bëriuguë partë cuerpë shtënëll según costumbrë shtë mënë israelitë, adë guëtí'idi'il sēñi ni. Si talë adë gúquëdi'il circuncidar iurë

gúquëll shmënë Dios, adë rdë'ëdi'il sí guëchuguë mënë shcuërpël. ¹⁹Nídi'i importë lu Dios si gúquëll circuncidar u aquëdi'i. Lo quë narunë importë lu Dios na guëzu'bë diáguëll mandamientë shtë mē. ²⁰Lo quë narunë tucarë gunë mieti na, tsagla'guë mieti mizmë ofici nanapë nguii iurë lë'ë Dadë guná'bëi' nguii ni. ²¹Si talë nal bajo ordë shtë sa'l iurë guna'bë mē lë'ëll, adë riádi'i ldú'ul. Perë si talë nanú manërë parë gápël libertá, pues mejurë guërú'ul librë. ²²Grë ra naná bajo ordë shtë sa'll iurë Dios guná'bëi' ra nguii ni, gúqui' shmënë mē nanapë libertá. Nu el quë nanádi'i bajo ordë shtë sa'll perë guna'bë mē lë'ëll, nall bajo ordë shtë Cristo. Rnibë'a mē lë'ëll. ²³Dios guzi'i mē lë'ëll tubi präci ru'bë; adë rdë'ëdi'il sí gac tē bajo ordë shtë ra mënë. ²⁴Bëchi, runë tucarë cadë nguii tsagla'guë gúnëll mizmë ofici catë tsu nguii iurë guna'bë Dios lë'ëll.

²⁵Iurní caquëa'a shcuendë ra lliguëna'a nadë bëtsé'adi'i. Adë nápëdia'a ni tubi mandadë shtë Dios perë rnia'a lu tē lo quë nalluá'ahia. Pues rac tsaldí ldu'u tē na purquë zihani vultë bëga'a ldu'u mē na, por ni runë tucarë guëqué diagüë tē shti'dza. ²⁶Lluá'ahia de quë mejurë guëa'në nguii tal cumë ziquë na nguii por tantë cusë durë naná ze'dë lu guë'dchiliu. ²⁷Si talë bëtsé'al adë rúnëdi'il llgabë parë guësá'nëll tsé'lëll. Si talë nápëdi'il tsé'lëll, adë riúbëdi'i ldú'ul parë guëtsé'al. ²⁸Perë si talë guëtsé'al, nádi'in duldë. Si talë guëtsé'a tubi lliguëna'a, adë nádi'in duldë. Perë grëtë' ra casadë gunë rall sufrir por

cusè durè naze'dè tiempè ne', nu rac shtua'a adè gápèdi'i tē más cusè durè.

²⁹Dadè, quèquèa'a lu tē; stu'pè tiempè rēa'nē. Iurne' parè delantè ra naná casadè, runè tucarè guèbani rall ziquè nádi'i rall casadè.

³⁰Ra naná tristè napè què guèriubè ldu'u rall tē gunè rall cumplir voluntá shtè Dios. Ra naná quèhunè ra laní, runè tucarè guèna'zi rall shchi'ni mē nasesè. Ra nartuu', runè tucarè adè gac shtú'udi'i rall cusè shtè guédchiliu. ³¹Ra narquitè ldu'u por ra cusè shtè guédchiliu, adè chu guèdè'di'i sí tē rnibè'a cusè shtè guédchiliu lè'èll, purquè guédchiliu nu ra cusè shtè tiempè ne', nasesè tsaluhin.

³²Rac shtua'a de què cadè tubi tē adè riádi'i ldu'u tē. Lè'è nguui naná sultèrè rquèdi'ni ldú'ull por ra cusè shtè Dadè Dios nu rac shtú'ull gúnèll cumplir voluntá shtè mē parè guèquitè ldu'u mē lè'èll. ³³Perè iurè lè'è sultèrè guètsé'all, iurní rac ldú'ull por ra cusè shtè guédchiliu nu parè guèquitè ldu'u tsé'lèll lè'èll. ³⁴Zni na con tubi lliguèna'a nu ra na'a casadè. Lè'è na'a nanápèdi'i tsé'lèll, rquèdi'ni ldú'ull por ra cusè shtè Dadè Dios tē gac na'a ni santu; rac shtú'ull gúnèll cumplir parè guèquitè ldu'u mē con lè'èll. Perè lè'è na'a casadè rquèdi'ni ldú'ull por ra cusè shtè guédchiliu nu rac shtú'ull gúnèll dchi'ni tē guèquitè ldu'u tsé'lèll lè'èll.

³⁵Quègnia'a lu tē ndè'è parè bien shtè tē, lédèdi'i parè adè guètsé'adi'i tē. Rac shtua'a guèbani tē manèrè za'què nu parè gunè tē sirvè Dadè con guèdubínú ldu'u tē.

³⁶Si tubi shtadè lliguèna'a rúnèll llgabè guèdè'èll permisi tē guètsé'a lliguèna'a purquè hia rdèdè galèllliguèna'a shtè'nèll, nu nané nguui ni rac shtu'u lliguèna'a guètsé'all, pues gac lo què narni'i ldú'ull; nádi'in duldè. ³⁷Perè si stubi nguui zull firmè con galèrni'i ldú'ull nu rnall de què shtsápèll nall cuntèntè sin què adè guètsé'adi'ill, nguui ni naná firmè de què adè guètsé'adi'i shtsápèll, bien quèhúnèll. ³⁸Zni el què naná quègdè'è shíni' parè guètsé'ai', quèhúnèll bien, nu zac el què nadè quègdè'èdi'i shíni' parè guètsé'a shíni', mejurè quèhúnèll.

³⁹Lè'è na'a casadè por lèy, nalí'bill hashtë gati tsé'li' perè si talè tsé'lèll gati, iurní na'a ni nápèll libertá parè guètsé'all stubi con el què narac shtú'ull perè sulamèntè si talè nguui ni rialdí ldu'i shti'dzè Dios. ⁴⁰Perè llua'ahia de què más guèquitè ldu'u na'a ni si guèá'nèll sin què guètsé'adi'ill. Ni na lo què narnia'a nu rialdí ldua'a de què zni na voluntá shtè Espíritu Santo naquèbezénú na.

Cumidè nabè'nè mènè ofrecèrè lu dzanè

8 Iurne' quèquèa'a shcuendè shtè dau naná gac ofrecèrè lu ra figurè naruntsa'u mènè con guia'a mènè. Bien rac bè'a hia'a custumbrè ni nápèdi'in valurè; adè rlluf'idi'in. Adè chu gunè nadchínidi'i por lo què nananèll, mejurè gac shtu'u mieti sa' mieti parè tsaru'bè vidè cubi nabène'e Espíritu Santo. ²Si talè tubi de lè'è tē runè nadchini por lo què nariasèl,

pues todavía runë faltë zihani cusë parë riasël. ³Si talë tubi de lë'ë të rac shtú'ul Dios de verdá, pues Dios rúni' recibir nguii ni ziquë tubi shini më.

⁴Gunia'a ndë'ë parë gac bë'a të shcuendë ra dau naquëhunë mieti ofrecërë lu ra dzanë. Pues rac bë'a hia'a de quë tubi figurë nápëdi'in vidë; nápëdi'in fuersë parë guédchiliu rë', nu rac bë'a hia'a nanú tubsë Dios. ⁵Pues quëgni'i mënë nanú ra dios gube'e nu dios lu guédchiliu; pues ra dios ni nu ra dadë ni zihani rai' nanú ⁶perë parë lë'ë hia'a nanú tubsë Dios, Shtáda'a. Lë'ë më bëntsá'ui' grëtë' ra cusë. Nabánia'a parë guédë'na'a cumplir lo quë narac shtu'u më, nu zac nanú tubsë Dadë Jesucristo, Shláma'a. Por lë'i' gurështë grëtë' ra cusë nu nadápa'a vidë eternë por lë'ë më.

⁷Perë grë ra mieti adë rac bë'adi'i rall ndë'ë. Antsë bë'në rall adorar ra dzanë nu todavía napë rall rëspëti iurë rau rall belë naguc ofrecërë lu ra dzanë. Adë rialdídí'i ldu'u rall firmë nu rini la'ni ldu'u rall na rall culpablë iurë rau rall belë ni. ⁸Perë por ra cusë nardáuha'a adë gáca'a mejurë u más peor delantë lu Dios. Adë rúnëdi'i importë si talë ráuha'a u adë ráudi'i hia'a. Igual nahin parë Dios. ⁹Perë gulë gapë cuidadë de quë libertá nanápël parë gaul grëtë' ra cusë, adë gaquin ejemplë mal parë sa'l nu ldaguëll lu duldë por ejemplë shténël. ¹⁰Tubi comparaciuni, lë'ël rdë'ël cuendë ra dzanë nápëdi'i rall vidë, nu rzubënul mënë catë rau të belë naguc ofrecërë lu ra dzanë. Si talë

tubi sa'l narialdí ldu'i Dios, rnall lë'ël nga'li nu creenci shténël na débíl, lo quë naquëhúnël rsédchini mal llgabë parë nguii ni nu gúnël tubi cusë nanádi'i za'quë parë lë'i'. ¹¹Lë'ël nanël verdá perë guëluá'al mal nezë parë sa'l; adë nazá'quëdi'in. Pues guti Cristo por nguii ni igual ziquë guti më por lë'ël. ¹²Iurë quëhúnël duldë cuntrë bëchi sa'l, iurë rguíníl llgabë shtë sa'l naná débíl, pues también quëhúnël duldë cuntrë Cristo. ¹³Por ni rëglë shtëna na zndë'ë; si talë quëhuna tubi cusë narunë ldaguë bëcha lu duldë, nunquë jamás adë gáudia'a belë, no sea nahin mal parë bëchi la sahia nu gúnël duldë por ejemplë shtëna.

Derechë nanapë tubi poshtë

9 ¿Gu adë rialdídí'i ldu'u të shti'dza? Pues napa libertá nu grë derechë cumë los de más poshtë shtë më. Gunahia lu Jesucristo, Shláma'a. Nu lë'ë të na të resultadë shtë shchi'nia nabëna en el nombre shtë Dios. ²Parë stubi ra mënë nádia'a poshtë perë parë lë'ë të napë quë rac bë'a të nahia poshtë shtë më purquë lë'ë të na të ziquë tubi muestrë de quë nahia poshtë de verdá purquë unidë na të con lë'ë më.

³Ndë'ë na lo quë narnia'a lu ra mënë narni'i cuntrë na. ⁴Napa derechë guëcahia lo quë narne'e mënë gáuha, nu parë gua'. ⁵Napa derechë parë cahia tubi na'a parë gunë tse'la compa'ni na lu ra viajë igual ziquë runë los de más poshtë. Zni quëhunë ra bëchi Dadë Jesús nu Pedro. ⁶¿U runë të llgabë de

quë Bernabé nu na, na na'a lúniqué nanápédi'i dereché parë guës'a'në na'a dchi'ni material parë guëni'inú na'a mënë ra diza'quë? ⁷ ¿Ca na nguii narunë sirvë ziquë suldadë perë rállëll por gashtë nanápëll? ¿Chull rcabní hiaguë uvë perë ráudi'll nashi shtë hiaguë ni? Grë vëquërë naquëhapë ma ¿pë ruu'di'll leché? ⁸ Adë rúnëdi'i tē llgabë de quë di'dzë rē' na shgabë nguii sulamëntë purquë lëy nabëquë'ë Moisés rni'i igual. ⁹ Rni'i lëy shtë Dios: “Adë rgúdi'il guë'shu rua' ngunë naná rguitsë trigu”. Pues clarë nahin; adë quëgní'idi'i Dios di'dzë rē' purquë rga'a ldu'u mē ra ngunë ¹⁰ sino nahin tubi comparaciuni parë lē'ë hia'a. Lëy ni naescritë parë bien shtë hia'a. El quë naraa'në lu guiu'u nu el quë narcabní bē'dchi, guërüpë rall runë rall dchi'ni purquë cuezë rall dzë gunë rall recibir partë shtë cuseché narunë tucarë cadë lē'ë rall. ¹¹ Iurnë bēcabní na'a bē'dchi narne'le vidë cubi parë lē'ë tē. ¿Pë llua'a tē na mal si guëdē'në na'a recibir cusë material de lē'ë tē? ¹² Pues si stubi mënë napë dereché gúnëll recibir cusë material shtë tē, másru'u dereché napë na'a guëdē'në na'a recibir cusë ni.

Perë adë guná'bēdia'a niétiqué de lē'ë tē. Rua'a ldu'u na'a grë cusë durë; gudilli na'a gashtë shtë na'a parë másru'u guërē'tsë diza'quë shtë Cristo. ¹³ Nané tē de quë ra narunë dchi'ni la'ni iádu'u ru'bē, quëhunë rall recibir partë ra cusë nardē'ë mënë ziquë ofrendë lu Dios. Ra naná quëhunë dchi'ni rua' bëcu'guë, runë rall

recibir tubi partë shtë ra ma naguc ofrecërë lu bëcu'guë. ¹⁴ Igual manërë na, lē'ë Dadë gunibé'ai' el quë naruadi'dzë diza'quë shtë mē, gúnëll recibir lo quë narquí'nill; guëdē'ë ra shmënë Dios lo quë narunë tucarë cá'all. ¹⁵ Perë na nunquë guná'bēdia'a dumí lu tē. Nu zac adë quëquë'édia'a ndē'ë parë guna recibir dumí shtë tē. Mejurë gatia antsë guëdchisú mënë lē'ë galërquitë ldua'a nanapa por mudë nanabania entrë lē'ë tē.

¹⁶ Parë na adë runë nadchínidia'a purquë ruadi'dza diza'quë, purquë ni napë quë guna; zni Shlama gunibé'ai' guna. Pues prubi de na si talë adë guadi'dzēdia'a diza'quë. ¹⁷ Por ni si talë guadi'dza diza'quë sulë por prupi voluntá shtëna, runë tucarë tubi premi cahia; perë quëhuna cumplir purquë nahin mandadë shtë Dadë; nahia ziquë tubi muzë nanapë quë gunë dchi'ni por la fuersë. ¹⁸ ¿Pë premi napa iurne'? Nahin de quë quëadi'dza diza'quë lu ra mënë, perë adë rúnēdia'a cubrë ni tubi centavë. Quiere decir adë quëhúnēdia'a cubrë lu ra mënë aunquë napa dereché cahia ayudë shtë rall.

¹⁹ Nádia'a bajo ordë shtë ra mënë, perë nahia siervë shtë mieti tē parë guna gan másru'u mënë parë Cristo. ²⁰ Iurë guquërela entrë ra mē israelitë, nahia cumë lē'ë rai' parë guna gan lē'ë rai' por Cristo. Iurë nanúa entrë ra naná bajo ordë shtë lëy, pues nahia cumë lē'ë rai' tē parë guna gan lē'ë rai' por Cristo. ²¹ Iurë nanúa entrë ra naguënédi'i lëy shtë Dios, nahia ziquë lē'ë rai' parë guna gan lē'ë rai' por Cristo.

Adë rúnëdi'i cuntienë ndë'ë de quë nápëdia'a rëspëti parë lëy shtë Dios, sino guca ziquë lë'ë rall të gac bë'a rall verdá shtë Dios nu gac rall shmënë Cristo. ²²Iurë nanúa ladi ra nadë rialdídi'i ldu'i con guëdubínú ldu'u rai', nahia ziquë lë'ë rai' të parë guna gan lë'ë rall; tsaldí ldu'u rall más. Quiere decir, guquërela ziquë cualquier sahia të parë guna gan lë'ë rai' por Cristo. ²³Quëhuna grë ndë'ë parë guërë'tsë diza'quë nu parë guëquitë ldu'a'a juntë con lë'ë të por ra cusë za'quë narsëdchini diza'quë.

²⁴Nanë të de quë entrë ra narllu'në tubi carrërë, tubsë naná gunë recibir premi. Gulë gubani ziquë el quë narllu'në lu carrërë parë gunë të recibir premi shtë Jesús. ²⁵Grëtë' ra narunë preparar parë deportë, rquë'ë guiá'all lo quë adë nazá'quëdi'i. Pues lë'ë rall quëhunë rall zni parë gunë rall recibir tubi premi, tubi corunë shtë guë'ë perë guë'ë ni lueguë rbidchi. En cambi lë'ë hia'a quëdë'na'a dchi'ni durë parë guëdë'na'a recibir tubi premi nanadë tsalúdi'i parë siembrë. ²⁶Adë rllú'nëdia'a lu carrërë ziquë ciegu; adë quëhúnëdia'a ziquë tubi nguü naná quëgdë'ë golpë lu mbë ²⁷sino quëgzac zia shcuerpa; quëhuna obligar el mizme cuerpë shtëna parë guëzu'bë diaguë shcuerpa voluntá shtëna. Zni canihuna; no sea de quë despuës de bëluá'ahia sahia shti'dzë Dios, guna fallar lu rëglë nu gúnëdia'a gan premi shtë Jesús.

Mënë narunë adorar ra figurë

10 Dadë, rac shtua'a gac bë'a të de quë ra shtadë guëlü

na'a despuës bëru'u rai' Egipto, guzë rai' guëa' shcahi nu gudëdë rai' Nisëdu'u Llni. ²Zni gac ziquë tubi galëriubë nisë parë lë'ë rai' purquë guanaldë rai' Moisés guëa' shcahi nu gudëdë rai' nisëdu'u. Bë'në rai' recibir Moisés ziquë lamë shtë rai'. ³Grëtë' rai' gudáu rai' con mizme dau nabëshe'ldë Dios. ⁴Grëtë' rai' bii' rai' mizme bebidë nabëdë'ë më purquë bii' rai' nisë nabëru'u la'ni guë'ë. Guë'ë ni na Cristo nabëshe'ldë Dios parë gúni' compa'ni lë'ë rai' lu nezë. ⁵Perë cantidá lë'ë rai' adë bëquítëdi'i ldu'u Dios con lë'ë rai', por ni bëa'në ra cuerpë shtë rai' nezë; guti rai'.

⁶Grë ndë'ë guzac parë gac bë'a hia'a lla quëhunë Dios; nahin ejemplë të adë chu guëzëbidi'i ldu'i cusë mal cumë ziquë bënë ra mënë ni. ⁷Por ni adë rúnëdi'i të adorar ra figurë naractsa'u cumë ziquë bënë bëldá ra më israelitë. Naescritë la'ni Sagradas Escrituras: "Ra mënë guzubë rall; gudáu rall; bii' rall; lueguë guasuldí rall parë guëgui'i rall lu figurë". ⁸Nu adë chu guëquënúdi'i sáhi' cumë ziquë bëldá ra mënë ni bënë rai' nu guti galdë bi tsunë mili mënë tubsë dzë. ⁹Nu adë chu guëtë'dë prëbë lu Dadë aunquë na më pacënci. Bëldá ra mënë ni bëtë'dë rall prëbë lu më nu gudahuë' serpientë lë'ë rai'; guti rai'. ¹⁰Nu adë chu guënf'idi'i cuntrë Dios cumë ziquë bëldá rai' bënë rai'; guti rai', bënë ianglë shtë galguti.

¹¹Grëtë' ndë'ë guzac ra shtadë guëlü hia'a parë gac bë'a hia'a lla quëhunë Dios. Na escritë ra ejemplë ni la'ni Sagradas Escrituras parë

lè'è hia'a nanabani iurne'. Pues hia blac izè gudèdè; hia parè lè'è hia'a bèdchini tiempè cubi. ¹²El què narialdí ldu'i zugá'all firmè lu shnezè Dios; pues gápèll cuidadè tè parè adè ldáguèdi'ill lu duldè. ¹³Cualquier cusè mal nartè'dè mèdzabè lu hia'a, igual nahin ziquè rdèdè lu los de más mènè, perè rac tsaldí ldu'u tè shti'dzè Dios. Lè'è mè jamás adè guèsán'èdi'i mè lè'è tè; guène'e mè pudèrè parè gunè tè gan lu ra cusè mal. Iurè guèdchini tubi cusè mal, iurní Dios guène'e mè pudèrè parè guèrú'ul la'ni ra cusè ni parè adè guèazè guétèdi'ill lu shnezè mè sino gáquèl firmè.

¹⁴Por ni bëchi narac shtua'a, gulè bëllu'nè catè runè mènè adorar ra figurè. ¹⁵Quègnia'a lu tè cumè ziquè ra nardè'è cuendè. Gulè bè'nè juzguè si talè na verdá lo què naquègnia'a iurne'. ¹⁶Iurè rdèa hia'a nu rdi hia'a la'ni copè nabè'nè ldai' Dios, nu rdè'è hia'a graci lu mè por vini ni, nahin tubi sèni de què quèdè'na'a recibir ra bendición naze'dè por galguti shtë Jesús. Nu iurè rdáuha'a guetèshtildi naná rllullè, na sèni de què unidè na hia'a con Cristo nu nadápa'a tratè con lè'i'. ¹⁷Aunque cantidá na hia'a, pues quèháuha'a pedasè shtë tubsè guetèshtildi; na hia'a tubsè cuerpè purquè unidè na hia'a con el què naná guetèshtildi verdaderè.

¹⁸Gulè guna'zi stubi ejemplè shtë naciuni Israel. Ra bëshuzi nabè'nè dchi'ni la'ni iádu'u, iurè gudáu rai' belè shtë ma nabè'nè mènè ofrecèrè lu Dios, rac bè'a hia'a de què lè'è rai' napè rai' tratè con Dios. ¹⁹Adè quègní'idia'a de què ra figurè

naractsa'u, napè rahin valurè, nilè adè quègní'idia'a de què belè naná guc ofrecèrè lu ra figurè, lasaquin. Aquèdi'i. ²⁰Lo què nacagnia'a na, lè'è ra mènè nanádi'i mè israelitè, iurè quèhunè rall ofrecèrè belè lu bëcu'guè, quèhunè rall ofrecèrin lu mèdzabè mal, lèdè lu Diósèdi'i. Adè rac shtú'udia'a lè'è tè gapè tè tratè con mèdzabè. ²¹Adè nídi'i mudè gu tè la'ni copè shtë Dadè Dios nu al mizmè tiempè gu tè la'ni copè shtë mèdzabè. Nídi'i mudè gau tè lu mellè shtë Dadè nu mizmè tiempè gau tè lu mellè shtë mèdzabè. Adè nídi'i mudè gúnèl adorar ra dzanè nu gúnèl adorar Dios mizmè tiempè. ²²¿Gu rac shtu'u tè guèldènú mè lè'è tè? ¿Gu napè tè más fuersè què lè'è mè?

Libertá nanapè ra shini Dios

²³Perè lè'èl rní'ill librè nal parè gúnèl lo què narac shtú'ul. Perè rnia'a lul, grè cusè adè rúnèdi'i compa'ni parè guèsé Espiritu Santo lè'èl. Verdá nadápa'a libertá parè guèdè'na'a zihani cusè, perè lèdè grédi'i quèhunè compa'ni parè su firmè sa' hia'a lu shnezè mè. ²⁴Runè tucarè quili nguii bien shtë sáhi', lédèdi'i bien shtë mizmè lè'èl.

²⁵Gulè gau grétè' lo què nardú lu llguèa' sin adè rna'bè dí'dzèdi'ill si na bien u na mal según creenci shténèl ²⁶purquè lè'è guédchiliu nu grétè' lo què nananú lu guédchiliu, rnibè'a Dadè Dios.

²⁷Si talè tubi sa'l nanadè rialdídi'i ldu'i shti'dzè Dios perè quèhúnèll invitar lè'èl gaul lídchill, pues gudáu grè lo què nangunè rall sirvè lul sin què adè rna'bè dí'dzèdi'ill si

lè'è cumidè gua delantè lu ra figurè.
²⁸Perè si talè tubi guèni'i lul: "Belè
 rè' guc ofrecèrè ziquè ofrendè lu
 ra figurè", iurní adè ráudi'il belè
 ni, no sea gúnèl dañi parè lè'è sa'l
 naguni'i di'dzè ni lul. ²⁹Quègnia'a
 ndè'è parè bien shtë sa'l, parè adè
 gúnèdi'il dañi fe shtë sa'l, lédèdi'i
 purquè nal débíl con creenci
 shtënèl.

Si talè tubi sa'l quègna'bè dí'dzèll:
 "¿Pèzielú conductè shtëna gac
 cunformè con llgabè shtë sahia?
 purquè nahia librè. ³⁰Si talè rdè'a
 graci lu Dios por lo què narauha,
 ¿pèzielú runè mieti juzguè conductè
 shtëna si fuèrè nahia pecadurè?"
³¹Perè rnìa'a lu tè, si rau tè u ruu'
 tè u cualquier stubi cusè, gulè
 bè'nè grè cusè parè gunè mieti
 alabar Dios. ³²Adè chu quèrèldèdi'i
 manèrè parè ldaguè los de más sa'
 tè lu duldè, nilè por ra mè israelitè,
 ni por ra nanádi'i mè israelitè, ni
 por ra grupè shtë shmènè Dios.
³³Règlè shtëna na zndè'è: adè
 rúnèdia'a ofender ra sahia; mejurè
 rac shtua'a guèquitè ldu'u rall; adè
 rgulia bien shtë na sino bien shtë
 los de más sahia tè parè gac salvar
 rai'.

11 Gulè tsagla'guè ejemplè
 shtëna ziquè tsagla'ga
 ejemplè shtë Cristo.

Règlè parè ra na'a naná rdèa

²Bèchi, rquitè ldua'a purquè
 siemprè rèagná ldu'u tè na nu
 ziaгла'guè tè enseñansè nabèluá'ahia
 lu tè. ³Perè rac shtua'a gac bè'a
 tè Cristo na cabèsè shtë nguii nu
 lè'è nguii na cabèsè shtë tsé'li' nu
 Dadè Dios na shlamè Cristo. ⁴Si

tubi nguii rè'au guèc nguii iurè
 lè'è nguii quèhúni' oraciuni, u iurè
 quèadí'dzi' diza'què naná ze'dè de
 Dios, quèhunè nguii ni desprèci el
 què naná cabèsè shtë nguii. ⁵Perè
 si tubi na'a adè ré'audi'i guèc na'a
 iurè quègná'bèll lu Dios u iurè
 quèadí'dzèll diza'què, quèhúnèll
 desprèci el què naná cabèsè shtë
 na'a. Igual nall ziquè na'a naná
 rchuguè guèdubi guitsè guèc rall.
⁶Si talè tubi na'a adè ré'audi'i
 guèc na'a, mejurè chuguè guitsè
 guèc na'a tubigasè, perè si talè
 parè lè'èll nahin shtu parè chuguè
 guitsè guèqui' u guèga'a guèc na'a,
 napè què guè'au guèc na'a. ⁷Lè'è
 nguii adè rquí'nidi'i guè'au guèc
 nguii purquè lè'è nguii quèhúni'
 representar personè shtë Dios nu
 rabtsè'è nguii gluri shtë Dios, perè
 na'a quèhúni' representar personè
 nu pudèrè shtë nguii. ⁸Iurè bèntsa'u
 Dios lè'è nguii, adè bé'nèdi'i' formar
 lè'è nguii de cuerpè shtë na'a sino
 bè'nè mè formar lè'è na'a de cuerpè
 shtë nguii. ⁹Lè'è mè bèntsa'u mè
 tubi na'a purquè bèqui'ni nguii lè'è
 na'a. Adè bèntsa'udi'i mè lè'è nguii
 por nicidá shtë na'a. ¹⁰Por ni rqui'ni
 guè'au guèc na'a ziquè sèni de què
 lè'è nguii na cabèsè shtë na'a nu
 runè tucarè guè'au guèc na'a ziquè
 sèni de què quèhunè rai' respèti lu
 ra ianglè. ¹¹Cumè unidè na shmènè
 mè por Cristo, lè'è nguii nápèdi'ill
 vidè sin lè'è na'a nu lè'è na'a
 nápèdi'ill vidè sin por lè'è nguii.
 Rqui'ni nguii na'a; ra na'a rqui'ni
 nguii. ¹²Ziquè lè'è na'a guc formári'
 de nguii, también lè'è nguii nápi'
 vidè por lè'è na'a. Pues grétè' cusè
 ze'dè de Dios.

¹³Gulë bè'ně juzguë mizmě lě'ě tē si talē na correctē guēna'bē tubi na'a lu Dios sin quē nē'audi'i guēc na'a. ¹⁴Mizmě llgabē la'ni ldu'u hia'a rni'i de quē si talē tubi nguiu nāpēll guitsē guéqu'i llēduni, nahin tubi shtu ¹⁵perē parē tubi na'a si talē guitsē guéqu'i na llēduni, nalē nasa'a nahin parē lē'i purquē zni bēdē'ē Dios guitsē guéqu'i parē guēsē'auhin guéqu'i. ¹⁶Si talē chu adē nādi'i de acuerdē nu rac shtū'ull gūnēll cuntrē enseānsē rē', pues rqui'ni gac bē'all de quē lē'ē na'a, ni los de más grupē shtē shmēnē Dios, nāpēdi'i na'a stubi custumbrē.

Manērē narunē tucarē gaul la Santa Cena

¹⁷Mientras quēgnehia cunseju parē lē'ē tē, nanū stubi cusē narunē tē perē adē nādi'in naza'quē. Quēhunē tē cusē dzabē. Iurē rdēā tē parē gunē tē alabar Dios, nādi'in parē bien shtē tē sino quēhunē tē mal. ¹⁸Primērē puntē iurē rdēā tē, nanū divisioni entrē lē'ē tē; adē na tē unídēdi'i. Zni rinia nu lluá'ahia nahin verdá. ¹⁹Pues rqui'ni tsu divisioni entrē lē'ē tē parē gac bē'a mieti chu na shmēnē Dios de verdá. ²⁰Perē iurē rdēā tē parē gau tē shtse shtē Dadē, lédēdi'i na shtse shtē Dadē purquē nādi'in ziquē bē'nē mē ordenar. ²¹Iurē rau tē, cadē tubi tē rguibēlú lu sa' tē parē gau tē lu shtse nanua'a tē mientras stubi sa' tē nāpēdi'i pē gáuhi'; stubi tantē tē rzuu'dchi tē con vini. ²²¿Pēllē adē nāpēdi'i tē lidchi tē catē rau tē, catē ruu' tē? ¿Pē adē nāpēdi'i tē rēspēti parē los de más shmēnē Dios? nu rgul shtu shtē sa'l nabēnāpēdi'i. ¿Pē

guēnia'a lu tē iurní? ¿Guēn'íhia na tē mē za'quē? Aquēdi'i.

Shtse shtē Dadē

(Mt. 26.26-29; Mr. 14.22-25; Lc. 22.14-20)

²³Bēluá'ahia lē'ē tē lo quē bēna recibir de lē'ē Dadē. Na zndē'ē. Mizmě gue'llē bē'nē mēnē traicionar lē'ē Dadē Jesús, guna'zi mē guetēshtildi. ²⁴Despuēsē de bēdē'ē mē graci lu Dios, iurní bēshullē mē guetēshtildi nu guni'i mē: "Gulē gau ndē'ē; shcuerpa ndē'ē. Bēllullin por bien shtē tē. Gulē gauhin parē guēagná ldu'u tē galguti shtēna." ²⁵Zni zac despuēsē lē'ē shtse gualú, guna'zi mē copē shtē vini nu guni'i mē: "Ndē'ē na copē narunē cuntienē conveñi cubi naná selladē por rēnē shtēna. Cadē vēsē gu tē vini ni, gulē bēagná ldu'u tē galguti shtēna." ²⁶Cadē vēsē rau tē guetēshtildi nu ruu' tē vini lu Santa Cena, quēglua'a tē stubi vēsē más pē runē significar galguti shtē Jesús hashtē guēabrí mē stubi.

Gulē gapē rēspēti parē shtse shtē Dadē

²⁷Rqui'ni gápēl cuidadē. Cualquier nanagáu guetēshtildi u nanagú la'ni copē shtē Dadē sin quē nāpēdi'ill rēspēti, quēhúnēll tubi duldē cuntrē cuerpē nu rēnē shtē Dadē. ²⁸Por ni cadē tubi tē rqui'ni gunē tē juzguē manērē nanabānil antsē gaul guetēshtildi nu antsē gul vini. ²⁹El quē naráu nu el quē naruu' la Santa Cena sin quē nāpēdi'i rēspēti lu cuerpē shtē Jesús, quēgsēdchini nguiu ni cashtigu parē mizmě lē'ēll. ³⁰Por ni zihani lē'ē tē rac llū'u tē; nāpēdi'i tē

fuersë, nu zac nanú bēldá ra sa' tē guti rai'. ³¹Perē si talē guēdē'na'a juzguē conductē shtēna'a, iurní adē gúnēdi'i mē juzguē lē'ē hia'a. ³²Perē iurē runē mē cashtigu lē'ē hia'a, nahin parē adē gáquēdi'i hia'a condenadē con los de más mēnē shtē guē'dchiliu.

³³Zni bēchi narac shtua'a, iurē rdēá tē parē gau tē shtse shtēnē mē, gulē cuezē los de más sa' tē antsē gau tē. ³⁴Si talē tubi tē rldiá'nēl, gulē gau cumidē lídchil tē parē Dios adē gúnēdi'i mē cashtigu lē'ēl iurē nardēá tē. Los de más asuntē guna rēglin iurē gueldē guēnahia lē'ē tē.

Don narzēlaa'dchi Espíritu Santo

12 Bēchi, rac shtua'a gac bē'a tē shcuendē ra don narzēlaa'dchi Espíritu Santo parē cadē tubi de lē'ē hia'a. ²Nanē tē bien iurē nianá na tē mēnē nadē guēnēdi'i Dios, guanaldē tē tēchi ra figurē nanápēdi'i vidē. Zni bē'nē tē según lo quē nabēlua'a mēnē lē'ē tē. ³Por ni, rac shtua'a gac bē'a tē tubi mē naquēbezēnú Espíritu Santo la'ni ldu'i, nunquē guēn'i'idi'll nacondenar Jesús. Nu zac sulē por pudērē shtē Espíritu Santo guēni'i mēnē Jesús na el quē nanapē derechē parē guēnibē'ai' guēdubi guē'dchiliu.

⁴Cadē tubi hia'a bēdē'na'a recibir don nabēzēlaa'dchi Espíritu Santo. Zihani clasē pudērē rzēlaa'dchi mē perē tubsē Espíritu nanú. ⁵Nanú zihani manērē parē gunē mieti sirvē lu Dios, perē rdē'na'a sirvē tubsē Dadē. ⁶Nu zac nanú zihani resultadē gurēnē perē tubsē Dios, el quē narunē parē gunē mieti

dchi'ni. ⁷Cadē tubi mieti bē'ni' recibir don nabēzēlaa'dchi Espíritu Santo tē parē grē hia'a guēdē'na'a provēchē. Fuersē ni rlua'a por lo quē naquēhunē nguui. ⁸Mizmē Espíritu quēgne'e llni nu pudērē parē guadi'dzē nguui con más llni ru'bē. Parē stubi mēnē mizmē Espíritu quēgdē'ēl fuersē parē ruadi'dzē nguui clarē di'dzē naze'dē de Dios. ⁹Stubi mēnē rúni' recibir fe por mizmē Espíritu. ¹⁰Stubi rúni' recibir pudērē parē gunēáquēll ra narac ll'u'u por mizmē Espíritu. Stúbi' rúni' recibir pudērē parē gúnēll milagrē. Stubi rúni' recibir fuersē parē guadi'dzēll diza'quē naná ze'dē de Dios. Stúbi' rúni' recibir pudērē parē gac bē'all guadē na espíritu falsē nu guadē na espíritu verdadērē. Stubi mēnē runē recibir fuersē parē guadi'dzēll dizē na nunquē bēsē'dēdi'ill. Hia stubi mēnē rúni' recibir fuersē nu pudērē parē guadi'dzēll pē runē cuntienē ra di'dzē gurēnē. ¹¹Grētē' ra cusē rē' ze'dē de Espíritu Santo naná rne'le llni parē cadē tubi mieti según lo quē narni'i ldu'u Espíritu.

Grē hia'a na hia'a ziquē tubsē cuerpē

¹²Grē ra shmēnē Cristo na ziquē tubi cuerpē nanapē zihani partē. Aunquē zihani na ra partē shtē cuerpē, nahin tubsē cuerpē. ¹³Pues grē hia'a, mēnē israelitē nu ra mēnē nanádi'i mē israelitē, ra naná bajo ordē shtē ra mēnē, nu ra nanapē libertá, grē hia'a bēáca'a tubsē cuerpē por lo quē nabē'nē Espíritu Santo. Bē'nē mē punērē cadē tubi hia'a la'ni cuerpē. Cadē túbia'a bēdē'na'a recibir mizmē Espíritu naze'dē de Dios.

¹⁴Tubi cuerpë napë zihani partë, lédëdi'i tubsë partë. ¹⁵Si talë guëa' hia'a guëni'i: "Adë nácia'a guia'a cuerpë; por ni adë nácia'a partë shtë cuerpë", lédë por nídi'i guëa' hia'a naseparadë parë lë'ë cuerpë. ¹⁶Si talë diága'a guëni'i: "Adë nácia'a slu; por ni adë nácia'a partë shtë cuerpë", lédë por nídi'i diága'a nasaparadë parë lë'ë cuerpë. ¹⁷Si talë guëdubi cuerpë na slu, ¿lallë guínia'a iurní? Si talë guëdubi cuerpë na tubi diaguë, ¿lallë tsúllia hia'a iurní? ¹⁸Perë Dios bészú cadë tubi partë shlugarin catë runë tucarë nu catë guc shtu'u më. ¹⁹Si talë grëtë' nahin tubsë partë, pues nádi'i cuerpë completë iurní. ²⁰Perë iurne' nanú zihani partë perë tubsë cuerpë.

²¹Slu hia'a adë gáquëdi'i guëni'i lu guia'a hia'a: "Adë rquí'nidia'a lél'él". Nu zac guéca'a adë gáquëdi'i guëni'in lu guëa' hia'a: "Adë rquí'nidia'a lél'él". ²²Al contrari, ra partë shtë cuerpë nanápëdi'i fuersë, partë ni más lasac parë cuerpë.

²³Ra partë shtë cuerpë narni'i hia'a nápëdi'in hunurë, rácuhin con más hunurë; ra partë nanádi'i nasa'a, quédé'na'a tratar con más cuidadë.

²⁴Ra partë shtë cuerpë namás nasa'a rquí'nidi'in mizmë cuidadë. Dios bé'ni' punërë grëtë' partë shtë cuerpë según voluntá shtë më. Ra partë narquí'nia'a menos, bédë'ë më más hunurë parë partë ni ²⁵të parë adë tsúdi'i ni tubi divisioni ladi cuerpë sino quë cadë partë shtë cuerpë gapin cuidadë por los de más sáhi'. ²⁶Si talë tubi partë shtë cuerpë quëzac zi u pë raquin, guëdubi cuerpë quëzac zi iurní. Si

talë tubi partë quëhunin recibir hunurë, pues guëdubi cuerpë rquitë ldu'in iurní.

²⁷Pues bien, lë'ë hia'a na hia'a cuerpë shtë Cristo; cadë tubi de lë'ë hia'a na hia'a partë shtë cuerpë ni.

²⁸Zni Dios bënë ordenar pë gunë cadë tubi shmënë më. Primërë gululë më ra poshtë, segundë lugar gululë më ra naruadi'dzë diza'quë naná ze'dë de Dios. Tecërë lugar gululë më ra mësë narlua'a shti'dzë më; cuartë lugar ra narunë milagrë, iurní ra narunëac ra narac lluu. Nu gululë më ra narunë compa'ni, nu ra narnibë'a, nu ra naruadi'dzë stubi dizé. ²⁹¿Ni mudë grëtë' hia'a na hia'a poshtë? ¿Ni mudë grëtë' hia'a na hia'a ra naruadi'dzë diza'quë naze'dë de Dios? ¿Ni mudë grëtë' hia'a na hia'a mësë, u guëdëna'a milagrë, ³⁰u nápa'a pudërë parë gunëaca'a ra narac lluu, u grëtë' hia'a rac ruadí'dza'a dizé gurënë? ¿Ni mudë grë hia'a rac guëni'ia'a pë runë cuntienë ra dizé ni? Pues clarë nahin; lédë znídi'in. ³¹Gulë guc shtu'u lo quë narzëlaa'chi Espiritu Santo, lo quë narunë compa'ni más grë ra shmënë më. Iurne' guëluá'ahia lë'ë tē lo quë naná mejurë quë grë ra cusë rē'.

13 Si talë raca ruadi'dza dizé shtë mënë nu ra dizé shtë ra ianglë, perë adë rac shtú'udia'a sahia, nápëdia'a amor, nahia ziquë gambanë nanídi'i chahi'; rsédchidi'in bien. Nahia ziquë cha' platí narsédchidi'i bien. ²Talë raca ruadi'dza lu mënë di'dzë naze'dë de Dios perë adë nápëdia'a amor, niétiquë nahia. Talë nanéa grë clasë secretë shtë mënë; talë riasëhia

guédubi naná rsë'dë mënë lu guédchiliu, nu si talë rialdí ldua'a Dios con guëdubinú ldua'a hashtë guëdchisú Dios ra dani lua, perë rac shtú'udia'a sahia, niétiquë nahia.

³Talë qui'dza grë nanapa ca'a mënë; talë guna intriegu shcuërpa parë tsequi lu gui'i, perë adë rac shtú'udia'a sahia, niétiquë nahia. Adë bë nápëdia'a iurní.

⁴El quë nanapë amor nápëll pacënci; nazá'quëll. Humildë nall. El quë narac shtu'u sáhi', adë rzëbidi'i ldú'ull pë shtë sáhi'; adë runë nadržínidi'ill lu sáhi'. ⁵Gúnëll lo quë narac shtu'u sáhi', lédëdi'i lo quë narac shtú'ull. El quë narac shtu'u sáhi', adë rldëdi'ill; adë nápëdi'ill mal lllabë. ⁶Nápëdi'i nguiu ni gustë iurë quëhunë mënë duldë. Mejurë rëuu' ldú'ull iurë ria mënë shnezë Dios nu iurë adë rní'idi'i mënë bishi. ⁷El quë nanapë amor, nunquë rní'idi'ill cuntrë sáhi'. Rialdí ldú'ull sa'll na më za'quë. Nápëll confiansë tsanaldë sa'll shnezë Dios. Rua'a ldú'ull lu grë cusë durë.

⁸Amor shtë Dios adë tsalúdi'in, perë guëdchini tiempë tsalú di'dzë naruadi'dzë mënë con pudërë shtë Dios. Guëdchini tiempë adë guadi'dzëdi'i mënë stubi dizé. Guëdchini tiempë lo quë nariasë hia'a, tsaluhin. ⁹Du'psë riasé hia'a ne'; zihani cusë adë riasédi'i hia'a. Ra narni'i di'dzë naze'dë de Dios, también runë faltë parë riasé rall grë cusë ¹⁰perë iurë guëdchini Jesús con guédchiliu cubi, grë lo quë nádi'i completë, tsaluhin. ¹¹Tiempë nahia llguë'në, biadi'dza ziquë llguë'në. Bëna lllabë ziquë

llguë'në. Bëna juzguë ziquë llguë'në, perë iurë bësa'na grë cusë shtë galëllguë'në, guaru'ba. ¹²Rnádi'i hia'a ra cusë clarë iurne'. Riasédi'i hia'a por completë. Ziquë rna hia'a lu guë'guanë gushë, rluá'adi'i bien luhin perë tubi dzë guená hia'a bien. Guená hia'a lu Dios. Riasé hia'a du'psë ne', perë dzë ni tsasé hia'a ziquë Dios nané më lë'ë hia'a. ¹³Tsunë cusë nápëdi'in fin: fe, esperansë, nu amor. Delantë lu Dios amor na mayurë.

Enseñansë parë el quë naruadi'dzë dizé gurënë

14 Gulë guni'i ldu'u gapë të más amor parë sa'll nu gulë gudili pudërë narne'e Espíritu Santo parë guadi'dzëll shti'dzë Dios. ²Ra mieti naruadi'dzë dizé gurënë quëadi'dzëll lu Dios, lëdë lu mënëdi'i, purquë ni tubi adë chu riasédi'i lo quë narni'i mënë ni. Ruadi'dzëll por pudërë shtë Espíritu Santo, perë di'dzë ni naga'chi parë los de más sa'll. ³Perë en cambi el quë naruadi'dzë di'dzë naze'dë de Dios, quëadi'dzëll lu ra sa'll të parë tsaldí ldu'u rai' más nu parë su rall firmë lu shnezë Dios. Rdé'ëll cunseju parë bien shtë sa'll. ⁴El quë naruadi'dzë dizé gurënë, rúnëll parë bien de mizmë lél'ëll, perë el quë naruadi'dzë di'dzë naze'dë de Dios, rúnëll bien parë tsasé grupë shtë shmënë Dios ra enseñansë shtë më.

⁵Na rac shtua'a de quë grétë' të gapë të fuersë parë guadi'dzë të dizé gurënë, perë más rac shtua'a guadi'dzë të di'dzë naze'dë de Dios; pues más lasac el quë naruadi'dzë

diza'quë quë mënë narac ruadi'dzë dizé gurënë. Shti'dzë mënë naruadi'dzë dizé gurënë, lasáquëdi'in parë los de más sáhi' si talë nídí'i tubi narní'i pë runë cuntienë ra dizé gurënë; napë quë guëní'll pë runë cuntienë ra di'dzë tē napë shmënë Dios provëchë. ⁶Por ni bëchi, si talë na gueldë guënahia lë'ë tē nu guadi'dza stubi dizé nanadë riasédi'i tē, adë guëllu'idi'in parë lë'ë tē. Rqui'ni guadi'dza lu tē enseñansë nabëlua'a Dios lua u tubi di'dzë nabëna recibir de lë'ë më u tubi di'dzë naze'dë de lë'ë më u tubi enseñansë shtë më; iurní sí gunë tē provëchë.

⁷Ne' guënia'a tubi comparaciuni. Ra gui'bë músiquë nanápëdi'i vidë ziquë flauta u tubi arpa, si talë adë riubédi'in clarë, òlla gac bë'a mieti pë ru'ldin, guadë na piesë naguëna'zin? ⁸Nu lu tubi guërru, si talë lë'ë cha' trompetë riubédi'in clarë òchull gunë preparar parë guëná'zill guërru? ⁹Mizmë zac lë'ë tē, si talë ruadi'dzël tubi dizé nanadë riasédi'i mieti, òllallë gac bë'a mieti guadë naquëgní'il? No sea shti'dzël na ziquë tubi naruadi'dzë sulë mbë. ¹⁰Nanú zihani dizé naruadi'dzë mënë la'ni gué'dchiliu; grëhin nanú shnézi'. ¹¹Perë si talë adë riasédia'a dizé shtë stubi naruadi'dzë, nahia ziquë tubi më zitu parë lë'ë mënë ni nu lë'i' na ziquë më zitu parë na. ¹²Por ni hia quë lë'ë tē rac shtu'u tē gapë tē pudërë nu llin shtë Espíritu Santo, gulë guna'bë lu Dios por pudërë parë guadí'dzël enseñansë tē tsaldí ldu'u mieti shti'dzë Dios más. ¹³Zni na el quë naruadi'dzë di'dzë gurënë, napë quë guëná'bëll lu Dios

tē parë guëdë'ë më pudërë parë guëní'll pë runë cuntienë di'dzë ni. ¹⁴Si talë ruadi'dzënúa Dios con di'dzë gurënë, quëгна'ba lu Dios con espíritu shtëna, perë adë quëgúdia'a provëchë parë shgaba cumë riasédia'a di'dzë ni. ¹⁵¿Pëllë guna iurní? Guëna'ba lu Dios con espíritu shtëna nu zac guëna'ba lu më con dizé nariasé mieti. Gulda ra labansë con espíritu shtëna nu zac con di'dzë nariasëhia ¹⁶purquë si talë quëadi'dzënul Dios nadë más con espíritu shtënël, el quë narquë diaguë, el quë nadë bë'nëdi'i recibir pudërë shtë Espíritu ziquë lë'ël, adë gúnëdi'ill gan tsasëll shti'dzël. Nu adë gáquëdi'ill guëní'll: “Nia Dadë”, iurë tsalú oraciuni, iurë rdé'ël graci lu më. Nguiu ni adë riasédi'ill lo quë narní'il. ¹⁷Pues bien quëgdé'ël graci lu më perë parë stubi sa'l adë nápëdi'ill provëchë la'ni ldu'ull. ¹⁸Quëgdë'a graci lu Dios de quë na ruadi'dza di'dzë gurënë por pudërë shtë Espíritu Santo más quë grétë' mënë ¹⁹perë catë rdé'a grupë shtë shmënë Dios, más rac shtua'a guënia'a ga'i di'dzë nariasé mënë quë chi'i mili di'dzë nanadë riasédi'i mënë. Iurë ruadi'dza, rac shtua'a guëlu'ahia di'dzë naná parë bien shtë mieti.

²⁰Bëchi, adë rúnëdi'i tē ziquë llguë'në nadë rac bë'adi'i guadë naná bien nu guadë naná mal, perë en cuantë ra cusë mal, rac shtua'a gac tē ziquë më gushë nardë'ë cuendë. Rac shtua'a gac tē llguë'në inocentë en cuantë ra cusë dzabë. ²¹Naescritë la'ni librë shtë lëy: “Guadi'dza lu naciuni rë' stubi dizé gurënë. Mënë zitu guëni'i rall

shti'dza, rni'i Dadë." ²²Zni na, ra dizé gurënë naruadi'dzë mënë por pudërë shtë Espíritu Santo, na rahin ziquë sēni parë ra nadë rialdídi'i ldu'i Dios, lédëdi'i parë ra narialdí ldu'i shti'dzë më. En cambi el quë naruadi'dzë diza'quë naná ze'dë de Dios, nahin ziquë sēni parë ra narialdí ldu'i shti'dzë më, lédëdi'i parë ra nanadë rialdídi'i ldu'i.

²³Iurë grupë shtë shmënë Dios rdëá, si talë grëtë' quëadi'dzë stubi dizé por pudërë shtë Espíritu Santo nu ze'dë tsuté ra nadë rialdídi'i ldu'i, u ze'dë tsuté mënë nadë rac bē'adi'i shcuendë ra cusë ni, iurní guēni'i rall rac luguë tē. ²⁴Perë si talë grëtë' tē quëadi'dzë di'dzë naze'dë de Dios nu tsuté tubi nanadë rialdídi'i ldu'i diza'quë, u mënë nadë bēsē'dëdi'i shti'dzë më, iurní gunguë bē'a nguii ni duldë shtēñll nu shti'dzë tē gunë juzguë lē'ëll.

²⁵Grëtë' cusë naga'chi la'ni ldu'u nguii ni, guëru'uin lu llni nu iurní guëzullíbill lu më; guēni'ill llëru'bē na pudërë shtë Dios. Guēni'ill Dios quëbezēnúhi' lē'ë tē de verdá.

Iurë tsu cultë, gaquin con ordë

²⁶Pues iurní bēchi, iurë rdëá tē, si tubi de lē'ë tē nápēl tubi cantë, stubi tē napē tubi enseñansē, stúbill rac shtú'ull guēni'ill di'dzë gurënë, stubi nguii rac shtu'u guēni'ill di'dzë nabē'nēll recibir de Dios, stubi tē rac shtú'ul guēni'ill pē runë cuntienë ra di'dzë gurënë; bien nahin. Nadë más gulë bē'nē grē ni parë tsaldí ldu'u ra shmënë Dios más. ²⁷Iurë ruadí'dzël stubi clasë dizé, pues biadi'dzë chupë u por más tsunë tē nu por turnë.

Nu zac rqui'ni tubi naguadi'dzë pē runë cuntienë dizé ni. ²⁸Si talë nídi'i naguēni'i shcuendë di'dzë ni, mejurë adë guadí'dzēdi'ill lu grupë shtë shmënë Dios. Mejurë guadí'dzēnul Dios la'ni ldu'ul guitsë guitsë. ²⁹Nu si talë guadí'dzēl diza'quë naze'dë de Dios, pues guēni'i chupë mieti u tsunë ra mënë narēta'; hia los de más gunë rai' juzguë lo quë naguni'i ra nguii ni. ³⁰Perë si talë Dios guēnē'eí' galérac bē'a parë stubi sa' tē naquëbezë nga'li, iurní lē'ë naguna'zi di'dzë primērë, guëac dchi; adë tsaglá'guēdi'i guadí'dzēll. ³¹Manērë ni grëtë' tē narunë recibir di'dzë naze'dë de Dios, gulë biadi'dzë tubi por tubi tē parë grëtë' tē tsasē'dë tē nu gunë tē provēchē ra di'dzë ni. ³²El quë naruadi'dzë diza'quë naze'dë de Dios, pues el mizmë lē'ëll nápēll pudërë parë guadí'dzēll u parë adë guadí'dzēdi'ill. ³³Dios adë rsēdchínidi'i' desordë sino rquitë ldu'u më iurë tsu cultë con ordë. Zni rluá'ahia ra grupë shtë shmënë Dios, ra nabēzunē më almē shtë rai'.

Ziquë na custumbrë entrë grē ra shmënë Dios, ³⁴ra na'a adë nápēdi'i rall derechë parë guadí'dzë rai' lu cultë; adë bēdē'ë Dios sí parë guadí'dzë rai' sino gac rai' obedientë ziquë cagnibē'a më la'ni lēy. ³⁵Si talë rac shtu'u tsasē rai', guēna'bē di'dzë rai' lu tse'lē rai' lídchi' purquë nádi'i bien si talë tubi na'a guadí'dzēll lu cultë.

³⁶Napē quë gac bē'a tē de quë shti'dzë Dios adë guzublúdi'i con lē'ë tē nu nádi'i tē lúniquë mënë nabē'nē recibir shti'dzë më. ³⁷Si

talë tubi të rní'il b'é'něl recibir diza'quë naze'dë de Dios, u si talë cagní'il ruadí'dzël por pudërë shtë Espíritu Santo, napë quë gac bé'al lo quë naquëquëa'a ndë'ë nahin tubi mandadë shtë Dadë Dios. ³⁸Perë si talë adë nédí'i nguiu gac bé'all nahin verdá, pues gulë bësa'në lë'ëll lu nacahi shtë'nëll. ³⁹Bëchi, gulë guni'i ldu'u parë gapë të pudërë parë guadi'dzë të diza'quë naze'dë de Dios; adë rcádi'i të guadi'dzë ra mënë stubi dizë ⁴⁰perë gulë bënë grë cusë con ordë, lëdëdi'i con desordë.

Guashtë Cristo ladi ra tēgulë

15 Iurne' bëchi, rac shtua'a guëagná ldu'u të diza'quë naná biadi'dza lu të. Bënë të recibirin nu tsagla'guë rianaldë të nezë shtë më con guëdubinú ldu'u të. ²Por diza'quë ni nasalvar të si talë tsagla'guë të lo quë nabëluá'ahia lë'ë të. Nasalvar të si gualdí ldu'u të shti'dzë më de verdá.

³Primërë lugar, bëluá'ahia lë'ë të grë enseñansë nabëna recibir. Bëluá'ahia lë'ë të de quë Cristo guti por ra duldë shtëna'a cumë ziquë rni'i la'ni Sagradas Escrituras. ⁴Bëga'chi më nu guashtëhi' ladi ra tēgulë dzë tsunë, igual ziquë rni'i ra Sagradas Escrituras. ⁵Bëluá'ahia lë'ë të de quë bëlua'alúhi' lu los de más poshtë. ⁶Despuësë bëlua'alúhi' lu más de ga'i gahiu'a shmënë Dios naná bédëá. Zihani mënë todavía nabani rai'; sëbëldá rai' hia guti rai'. ⁷Despuësë bëlua'alú Cristo lu Jacobo, iurní lu grë ra poshtë shtëni'.

⁸Hia despuësë de ni bëlua'alú më lua aunquë nahia ziquë tubi lguë'në nabëdchini lu guë'dchiliu antsë gac cumplir tiempë parë gáli'. ⁹Nahia el quë nalasáquëdi'i entrë los de más poshtë shtë më. Adë rúnëdi'i tucarë gaca poshtë purquë guzunalda ra shmënë Dios. ¹⁰Perë lo quë nanahia iurne' na purquë guc shtu'u më na nu bënë më zihani favurë parë na. Lo quë nabënë më por na, napë resultadë. Bëna dchi'ni más quë los de más mënë aunquë nilë lëdë nádi'i, sino quë Dios bëne'e fuersë nu bënë ldai' më na. ¹¹Perë adë rúnëdi'i importë chu bënë más dchi'ni. Biadi'dzë na'a lu të ra diza'quë nu gualdí ldu'u të shti'dzë më.

Tsashtë ra tēgulë stubi

¹²Si talë ruadi'dzë na'a de quë Cristo guashtëhi' ladi ra tēgulë çpëzielú bëldá de lë'ë të rni'i të de quë tsashtëdi'i ra tēgulë? ¹³Si adë tsashtëdi'i rai' ladi ra tēgulë pues tampuquë lë'ë Cristo adë guashtëdi'i' ladi ra tēgulë. ¹⁴Talë Cristo adë guashtëdi'i ladi ra tēgulë, hia diza'quë naná biadi'dzë na'a lu të nápëdi'in valurë nu fe shtë të nápëdi'in valurë; lasáquëdi'in. ¹⁵Si talë nahin zni, rlua'a clarë na na'a testigu falsë purquë hia lë'ë na'a guni'i na'a lu ra mënë de quë Dios bëldishtë Cristo ladi ra tēgulë. Perë si talë nádi'in verdá de quë ra tēgulë adë tsashtëdi'i rai' stubi, pues iurní zac lë'ë Dios bëldishtëdi'i më lë'ë Cristo. ¹⁶Si talë tēgulë adë tsashtëdi'i rai' stubi, iurní lë'ë Cristo tampuquë guashtëdi'i' ladi ra tēgulë. ¹⁷Si

talë Cristo adë guashtëdi'i ladi ra tēgulē, fe shtë tē adë rllui'idi'in; todavía adë naperdunē duldē shtë tē. ¹⁸Nu ra tēgulē nagualdí ldu'u shti'dzē Jesús, adë nádi'i rai' salvar. ¹⁹Si talē rialdí ldu'u hia'a shti'dzē Cristo napin valurē sulamēntē mientras quērēlda'a lu guédchiliu, iurní prubi na hia'a; nápēdi'i hia'a esperansē nu runē tucarē guēga'a ldu'u mēnē lē'ē hia'a.

²⁰Perē verdá na de quē Cristo guc resucitar ladi ra tēgulē; na mē lē'ē primērē naguashtë parē adē guēabrídi'i gátí' stubi. ²¹Pues ziquē guzublú galguti por tubsē nguui, también por tubi nguui guzublú galēriashtë shtë tēgulē. ²²Pues grētē' mēnē napē quē gati rai' purquē na rai' llēbní Adán; zní zac grētē' naná unidē con Cristo, guēldishtë mē lē'ē rai' ladi ra tēgulē. ²³Perē cadē nguui según turnē narunē tucarē lē'ēll. Cristo gúqui' ziquē primērē naná gátidi'i parē siempre perē despuēsē iurē guēabrí mē stubi, iurní gátidi'i jamás ra naná unidē con lē'ē mē. ²⁴Iurní guēga'a iurē shtë fin; tsalú guédchiliu rē'. Guēdē'ē mē fin grētē' autoridá, grētē' ra nanapē pudērē, nu guēdē'ē mē fin parē grē ra narnibē'a lu guédchiliu. Iurní gunē mē intriegu catē rnibē'a mē ca'a Dios, Shtáda'a. ²⁵Guēnibē'a Cristo ziquē rēy hashtë iurē gunē Dios gan lu grē enemigu shtë Cristo nu guēzullibi rall lúhi'. ²⁶Lúltimē enemigu nangunē mē gan lúhi' na galguti ²⁷purquē Dios bēdē'ē mē derechē guēnibē'a Cristo grētē' cusē, perē iurē Sagradas Escrituras rni'i de quē Cristo nápi' derechē parē guēnibē'ai' grētē' cusē,

pues clarē nahin de quē Dios adē nádi'i' bajo ordē shtë Cristo, perē bēdē'ē mē derechē parē guēnibē'a Cristo guēdubi guédchiliu. ²⁸Iurē grētē' cusē guēa'nin bajo ordē shtë Cristo, iurní mizmē lē'ē Cristo, shini Dios, gúni' intriegu mizmē lē'i' con grē pudērē nanápi' lu Dios tē parē Dios gáqui' el quē nanapē grē pudērē parē siempre.

²⁹Nanú ra narni'i adē tsashtëdi'i ra tēgulē, perē si nahin verdá, ípēzielú rriubē nisē rall por ra naná guti? Si talē adē tsashtëdi'i tēgulē, mbanē na lo quē nacanihunē tē; mejurē adē guēchu'bē nisē tē sa' tē shlugar ra tēgulē.

³⁰Nu zac ípēzielú rdchi'ba vidē shtëna lu peligrē guēdubi tiempē si talē adē tsashtëdi'i ra tēgulē?

³¹Quēgnia'a lu tē verdá de quē grētē' dzē nanúa lu peligrē shtë galguti. Runē nadchinia por dchi'ni nabēna entrē lē'ē tē; guquin purquē unidē nahia con Cristo Jesús, Shláma'a.

³²Perē si talē nahin ziquē narni'i tubi dichē: “Gudildia con ra ma dushē la'ni guédchi Efeso” ípē cusē bēna gan si talē ra tēgulē adē tsashtëdi'i rai' stubi? Mejurē guēni'i hia'a: “Cha guédáuha'a; cha guédí hia'a; glii gati hia'a”.

³³Adē rdē'ēdi'i tē sí guēgugué mēnē lē'ē tē por di'dzē falsē. Nanú tubi dichē narni'i: “Ra amigu mal na rall causē rniti mēnē nezē za'quē”. ³⁴Gulē bē'nē llgabē bien nu gulē bēabrí ldu'u tē tubi nezē za'quē nu adē rúnēdi'i tē duldē, pues nanú bēldá tē naná guēnédi'i Dios bien. Rnia'a lu tē zndē'ē tē parē guētú lu tē du'pē.

Lla tsashtë ra tēgulē

³⁵Tal vez tubi de lē'ē tē guēna'bē dí'dzēl: “¿Llallē tsashtë ra tēgulē?

¿Lla na cuerpë gapë rai' iurë guëbani rai'?" ³⁶Di'dzë ni na tuntë. Nanël iurë lé'ël rcabnil bè'dchi, hia bè'dchi ni napë quë gu'dzë të parë guëru'u tubi plantë. ³⁷Grëtë' nargabnì la'ni guiu'u ziquë bè'dchi shtë trigu u stubi clasë bè'dchi, iurë rcabnilin, adë nápëdi'in formë shtë plantë sino nahin bè'dchi. ³⁸Dios rdë'ë më lu bè'dchi tubi formë narac shtu'u më, formë naná gurënë según narni'i ldu'u më. Cadë clasë bè'dchi rldanin nu napin formë narunë tucarë. ³⁹Grëtë' ra nanabani, nápëdi'i rall cuerpë igual; nanú cuerpë shtë mënë; stubi clasë cuerpë parë ra ma, nu cuerpë shtë ra ma'ni na stubi clasë; nu cuerpë shtë ra mbeldë gurënë nahin. ⁴⁰Nu zac nanú ra nanapë cuerpë lu gube'e, nu nanú ra nanapë cuerpë lu guédchiliu, perë cuerpë nananú gube'e, nasa'a rlua'ain. Lë'ë galnasa'a shtë cuerpë shtë guédchiliu gurënë nahin. ⁴¹Lë'ë llni shtë ngubidzë gurënë nahin con llni shtë mbehu, nu zac gurënë na llni shtë ra mbelëgui'i. Entrë ra mbelëgui'i tubi mbelëgui'i rabtsë'ë llni shtëhin másru'u fuertë lu sa' mbelëgui'i. ⁴²Zni na con tēgulë iurë riashtë rai'. Vidë shtë nguui na ziquë tubi bè'dchi naná rialú, perë iurë tsashtë nguui ladi ra tēgulë, adë gátidi'i' jamás. ⁴³Rtu lu hia'a por ra cuerpë nadápa'a iurne' purquë rati ra cuerpë, perë tsashtë hia'a nasa'a. Na hia'a débil iurne' perë iurë tsashtë hia'a ladi ra tēgulë, guédápa'a cuerpë fuertë naná tsalúdi'i. ⁴⁴Lu guédchiliu rë' nadápa'a cuerpë shtë guédchiliu perë iurë tsashtë hia'a ladi ra tēgulë,

guédápa'a cuerpë gurënë naná demasiadë nasa'a. Nadápa'a cuerpë shtë guédchiliu perë zac nanú cuerpë cubi narne'e Dios.

⁴⁵Rni'i ra Sagradas Escrituras: "Primëre nguui Adán béaqui' nguui nanabani", perë rnia'a lu të lë'ë Adán naná bēdchini despuēsë, na më lúniquë narne'e vidë cubi shtë Dios. ⁴⁶Lë'ë nguui shtë guédchiliu bēdch'i'ni' primëre con cuerpë naná guiu'u; hia despuēsë bēdchini nguui nanapë pudërë parë guënë'e'i' vidë espiritual. ⁴⁷Primëre nguui guctsa'u guiu'u; náhi' de guédchiliu, perë segundë nguui bēdch'ini' de gube'e. ⁴⁸Ziquë guc nguui naguctsa'u guiu'u, zni na grëtë' naralë la'ni guédchiliu. Ziquë guc nguui nabēdchini de gube'e nu guziá'ai' gube'e, zni na ra mieti nanapë vidë naze'dë de lë'ë më nacuezë gube'e. ⁴⁹Ziquë lë'ë nguui nápëll cuerpë shtë guédchiliu, también guédápa'a cuerpë ziquë cuerpë shtë Cristo nacabezë gube'e.

⁵⁰Bēchi, rnia'a lu të grëtë' cuerpë nadápa'a iurne' adë gáquēdi'i tsutēhin catë rnibē'a Dios. Lo quë nanapë quë tsalú, adë nápëdi'in partë con ra cusë nadë tsalúdi'i.

⁵¹Rac shtua'a gac bē'a të tubi secretë; lēdë grēdi'ia'a gati hia'a sino gac cambi shcuérpa'a. ⁵²De repēntë ziquë iurë rguini lāguēl, guínil cha' shtë trompetë; iurní ra tēgulë guëbani rai' stubi të parë jamás adë guēabrídi'i gati rai'. Hia lē'ë hia'a gac cambi iurní. ⁵³Lë'ë cuerpë shtëna'a narialú napë quë gac cambi parë adë tsalúdi'in jamás. Cuerpë shtëna'a naná rati, napë quë gac cambi të parë adë

gátidi'i jamás. ⁵⁴Dzè ni iurè lè'è cuerpè shtëna'a narialú gac cambi por cuerpè nadè rialúdi'i, nu lè'è cuerpè shtëna'a gac cambi por cuerpè nanadè gátidi'i, iurní gac cumplir lo què naná escritè la'ni Sagradas Escrituras: “Bèd'è mè fin lè'è galguti. ⁵⁵Lé'èl galguti, ìgua pudèrè shtënèl parè gúnèl gan lu grè mieti?” ⁵⁶Pues duldè bèsèdchini galguti parè lè'è mieti, nu duldè na ziquè tubi narnibè'a lè'è mieti purquè lèy shtë Dios rlua'a grè mieti na rall pecadurè. ⁵⁷Perè dushquilli Dios, rne'e mè pudèrè parè rac guèdè'na'a gan lu galguti por Jesucristo, Shláma'a. ⁵⁸Por grè ndè'è, bèchi narac shtua'a, gulè tsagla'guè firmè lu shnezè mè; adè tsaldídi'i ldu'u tè stubi ldai'. Gulè bè'nè dchi'ni shtë Dadè másru'u purquè nané tè dchi'ni naquèhunè tè juntè con lè'è Dadè, adè nádi'in sin resultadè.

Ofrendè parè ra shmènè Dios

16 Iurne' quèquèa'a shcuendè ra centavè nardèa parè ra mènè nabèzuné Dios almè shtë rai'. Gulè bètèa centavè según lo què nagunibé'ahia ra grupè shtë shmènè Dios naná quèrèldè regiuni Galacia. ²Cadè primèrè dzè shtë lmalè, cadè tubi de lè'è tè napè què guètèal centavè según lo què nabè'nèl gan. Gulè cutsa'uin tè parè nídi'i nicidá guètèa tè ofrendè iurè guèdchinia. ³Iurè guèdchinia ndè, guèshe'lda lè'è ra narunè tè nombrar; guèdè'a guia'a rai' tubi cartè shtë recomendación parè gua'a rai' ofrendè shtë tè hashtë Jerusalén. Gunè rall intriegu

centavè ni parè ra naquèrèldè nga'li. ⁴Si talè guèni'i ldua'a de què nu zac na tsahia, sènalde rai' na.

Guni'i ldu'u Pablo tsáhi' Corinto

⁵Napè què tsahia por regiuni shtë Macedonia; hia despuèsè de ni, guèdchinia Corinto. ⁶Adè na segurèdia'a perè guèquèrèldèna lè'è tè por du'pè tiempè u guètèda tiempè naldè nga'li con lè'è tè. Iurní zac gunè tè compa'ni na nezè shtëna catè guzèahia despuèsè. ⁷Adè rac shtú'udia'a gueldè guènahia lè'è tè por du'pè tiempè sino què rac shtú'uhia cueza con lè'è tè tubi visitè llèduni si talè na voluntá shtë Dios. ⁸Perè na guèana Efeso hashtë tsalú laní Pentecostés ⁹purquè ndè'è nanú zihani dchi'ni shtë Dadè Jesús parè guna cumplir. Tsaldí ldu'u ra mènè shti'dzè mè; perè nanú zihani contrari narunè cuntrè shti'dzè Dios.

¹⁰Si talè guèdchini Timoteo, gulè bè'nè tratè bien lé'i' tè parè adè riádi'i ldu'i purquè lé'i' quèhúni' dchi'ni shtëndè Dadè igual ziquè na. ¹¹Por ni adè chu gúnèdi'i desprèci lé'i'. Mejurè gulè bè'nè compa'ni lé'i' parè tsagla'gui' viajè shtëni' tè parè guèdchini gueldè guènáhi' na. Quèbeza lé'i' juntè con los de más bèchi la sa' hia'a.

¹²Lè'è bécha'a Apolos, bèna ruèguè lúhi' tè parè gúnèll compa'ni los de más sa' hia'a iurè gue'dè guèna rai' lè'è tè, perè Apolos quègní'ill de què nádi'i voluntá shtë Dios parè gue'dè guènall lè'è tè iurne', perè hashtë guène'e mè sí, iurní gue'dè guènall lè'è tè.

Rialú cartè rè' con saludè

¹³Gulè guc mènè nasini nu gulè tsagla'guè firmè lu shnezè

më. Gulë cue za'quë za'quë. Gulë bë'në shchi'ni Dios ziquë mënë naná rialdí ldu'i de verdá. Gulë gac nguii nadë rdzébëdi'i. ¹⁴Grëtë' lo quë nangunë të, gulë bë'nin con guëdubínú ldu'u të con amor parë los de más sa' të.

¹⁵Iurne' bëchi, nané të de quë famili shtë Estéfanas gac rai' primëre naná gualdí ldu'i shti'dzë Jesús; na rai' primëre nagualdí ldu'i shti'dzë Dios entrë grë mënë naquërelde regiuni Acaya. Nu tsagla'guë quëhunë rai' sirvë los de más mënë nabëzuné Dios almë shtë rai'. ¹⁶Rac shtua'a de quë lë'ë të guëzu'bë diaguë të shti'dzë mënë ziquë lë'ë rai' nu zac grë ra naná runë compa'ni parë shchi'ni Dios, nu gulë bëzu'bë diaguë shti'dzë ra mënë naquëhunë dchi'ni shtë më. ¹⁷Nalé rquitë ldua'a de quë bédchini Estéfanas, Fortunato, nu Acaico. Lë'ë rai' bë'në rai' cumplir lo quë narunë faltë nihunë të. ¹⁸Nalé bësëquitë

ldu'u rai' na nu zac lë'ë të. Napë quë gapë të respëti parë ra mënë ziquë lë'ë rai'.

¹⁹Ra grupë shtë shmënë Dios naquërelde regiuni Asia, quëgshe'ldë rai' saludë parë lë'ë të. Aquila nu Prisila con grupë shtë shmënë Dios nardëá lidchi rai', quëgshe'ldë rai' zihani saludë en el nombre shtë Dadë Jesucristo. ²⁰Gulë bë'në recibir saludë shtë grë ra shmënë Dios naquërelde ndë'ë. Gulë bë'në saldar grë ra shmënë Dios con tubi abrasë. ²¹Na Pablo, quëgshe'lda saludë parë lë'ë të con prupi shti'dza nabëquëa'a.

²²Si talë tubi de lë'ë të adë rac shtú'udi'il Jesucristo de verdá, pues grë ra mënë ni gac condenar. Rac shtu'u hia'a guëdchini Dadë Jesucristo lueguë.

²³Gulë bë'në recibir favurë nu bendición shtë Dadë Jesucristo.

²⁴Quëgshe'lda amor shtëna ziquë sahia naná unidë con Jesucristo. Amén.